

筆記小說大觀
集

毛祥麟著

墨餘錄
上

進步書局
校印



清毛祥麟著

墨餘錄

上海進步書局印行

墨餘錄提要


墨餘錄清毛君祥麟所著毛君幼而向學經史子集外稗
編野乘無不博觀偏覽逮宦遊跡里適遭洪楊之劫接時
感事目擊心傷乃以身之所歷耳之所聞筆而成此太平
垂成之敗同治中興之烈李文忠平蘇之戰績小金子亂
滬之淵源言之如數家珍他如柏俊一案為清代科場大
獄原原本本論斷不從阿筆孀妹奇遇雖本過墟錄而敘
述處妙有剪裁其餘鄉邦文獻滬濱佚聞靡不羅輯甄錄
即論處論醫本其素長尤多獨到之言同時齊氏有見聞
隨筆之刊雅俗蓋相去霄壤矣

自序

余少承庭訓成童就傅即知向學自經史書前賢詩文等集外諸如虞初所掌稗編散紀亦嘗棄函助觀摩繼因善病多間斷弗克竟業然自輟業以至於今又未嘗一日不觀書今且垂垂老矣竊維古有三不朽言與功德並稱我人生當盛世上之既未克志道據德分聖賢之席次亦不著名朝籍為國家建非常之功幸曾讀書解文義異於土木形骸而仍不克以言自見將所謂生無益於時歿無聞於後者有志之士宜何如感奮也雖然裁衣者必相體行遠者必計程言獨可以漫見哉是故訓纂之言經生事也非所學志傳之言史臣筆也非所職古文品高慮難企及詞令體纖報於俯就若夫詩以言志賦列九能私心固嘗好之而又恐風雲月露譏切通人即不然而稽古作家林立豈遽許列附庸下此令甲所垂則惟志科名者或有取焉以僕散材實不暇及且世之攻此者亦多矣乃竭其精能適供覆瓿燒薪之用也抑何憊也然則即以言論亦必審夫力之所及與夫分之所宜然後坦然出之而庶可無歎今夫小說九百昉自西京其製通雅俗互莊諧雖於藝文無當而自典章法度迄於動植飛潛曲狀幽陰旁通術藝諸凡人事之短長世變之大小無不載亦無不宜其或筆削奸諛發揮忠節言情紀事秩然有經蓋淺之而僅為說部者深之又具有史裁因嘗自審余

苟欲以言見斯誠心好而願學焉憶昔宦游越中未幾以疾歸繼又時方多故仕志漸灰而我滬自道光壬寅後越感豐之癸丑暨庚申辛酉屢經兵燹故余亦數遷其家船唇馬足耗盡壯心近雖復覩昇平而歲華已邁志趣愈恬惟當晝長飯飽絃詩讀畫之餘苦無所事因輒就未乾之硯撥舊聞徵近事俛辭異說匪意橫發叢篇脞牘隨變雜施積久成編釐為一十六卷以其餘墨所成即曰墨餘錄生是滬人宜多滬事頻罹寇亂因屢言之至凡殊俗奇製之登亦以海舶所湊聞見較多且審故得彙為家言初哂塊然衰翁無聊閒話惟於豆棚瓜架間新野老之聽焉耳豈遽擬以問世然而情之所寄敝帚亦珍矧當茲文治光昭譬若鳳翔千仞鶴唳九皋既各出其和聲逸響鳴盛一時矣而下及候蟲時鳥亦復自為鳴躍可已不已者夫非為化機元氣所鼓動於天而弗及知乎是錄之成殆無以異則固不必計其鳴之善否而始出矣將開錄我友雨蒼朱君又以書來勸錄其略曰文至司馬子長韓退之柳子厚蘇子瞻至矣遷史粉澤大猷而書封禪傳倉公又未嘗不元黃稗說若韓柳之巧者梓人毛穎傳捕蛇說等或有所寄託或出以遊戲要皆不拘常格而東坡志林尤挂人口此正如風行水上自然成文君之餘墨實與相近我將使剗氏劖氏來竟其事幸無卑紀事者必衷於是亦無小善讀者能見其大云余既得書意愈決遂以其副受手民不特取便於有

道之正也亦以見區區之心初不願與草木同腐則雖稗編散紀無足觀摩將共為覆瓿燒
薪之用而志猶可取博雅君子或終憫其愚而有以諒之歟
同治庚午仲春上海對山毛祥麟自識



對山書屋墨餘錄卷一目錄

孀姝殊遇

九老會

華十五傳

兔異

亞美利加小鳥

田史傳

星墮地震

籤驗

聖治丸方論

褚復生

測字奇驗

夢應

雪兒

燈市

拐兒挖目

乩仙受欺

尊稱

醒睡先生

席某返魂

石海

奚行鎮

好奇售偽

順天戊午科場案

還山圖

海濱問字圖記

鷹武將軍

對山書屋墨餘錄卷一目錄終

墨餘錄卷一

對山書屋原著

姊妹殊遇

明末廬山劉氏世業儒家雖落名相也兄弟守田廬伯曰魯廬邑諸生品行修飾仲曰肇周則狡黠嗜利不務恒業有妹曰三秀慧而艷生時母夢紫氣繞室醜有異香六歲母死父教之讀過目輒了了捉筆作楷秀逸獨絕時里有黃亮功者居任陽之大橋素雄於財亮更善居奇崇禎間吳中水旱頻仍物價騰貴藉之因盈糶虛家益富亮貌溫厚而中多機詐蓄資鉅萬即縮常若寒士年逾二十始議取婦則喪夫而挾重資者父曰楚也里多請婚者何必是亮曰我以車往彼以賄還楚何害遂娶焉婦姓陳善操持勤紡織相夫二十年其業因之愈熾亮素聞三秀之美適陳病瘞死乃挽郁某為媒曰果字我聘儀惟命冰上人亦當厚報耳郁乃商之劉仲仲曰吾兄素迂闊事必不諧若能以二百金為聘四十金酬我我當曲為成之亮如命仲遂乘間言於伯曰妹年十四矣凡求婚者卜咸不合意良緣或自有在頃郁某來云大橋黃氏擁資百萬宅第連雲婢僕數十輩現以喪偶乏內助欲為我妹議姻弟思此事得成妹終身可以無慮伯默然頃之仲復言曰事固有不可執者憶我母彌留時執妹

手顧父及我兄弟言曰。此女吾所愛。他日務嫁家之裕於我者。無與寒士。酸秀。不能有幾人。自奮為妻。擊福者。但願其安享朝夕。不至碌碌井臼旁。我目瞑矣。其言猶歷歷在耳。若今黃氏之富。羅綺盈箱。倉庾如御。母若在。必諾無疑矣。伯頓作色曰。汝何言。我家雖貧。固儒也。豈貪富厚。而以妹為賈人妻者。且彼之先陳氏。奴也。本姓王。以背主而易為黃。居崑之石浦。乃祖名元甫。復歸虞家塘市。元母為某宦乳媪。宦有田三千畝在虞。以媪故。妻元課租。元自正槁外。復蝕其十之三。詭言農欠。積久而成小康。乃父洪。尤凶暴。嘗悅一佃女。乃假佃以金。初不責償。越三年。權之。遂攫其女為妾。不久愛他。將轉鬻女。聞而縊時。某宦已死。子弟皆紈袴。不問生產。田皆分裂授他姓。洪欺宦無主。吞匿其半。自是大營宅地。居然為鄉里富人。然里之衣冠士。未嘗與之接也。今亮之為人。固稍斂跡。然計升斗。權子母。刻剝圖利。亦足稱黃之肖子。且妹年十四。彼已四十餘年。既不相若。門戶又不相當。何可婚乎。仲知言不能入。事遂寢。無何。伯暮遊山左。至維揚。見婚嫁者絡繹。詢其故。緣訛傳朝命。有中使至江浙。採民女以充掖庭耳。乃寄書於仲曰。此信至吳。亦必驚擾。然是訛言。萬不可信。悞妹終身事。仲得書喜。曰。四十金入我囊矣。因招郁曰。前議可成。然宜速為擇吉。遂覆書於伯曰。兄書未至。事已徧傳通國。不擇人而婚嫁者。不下數百家。司里恐臨期不免應命。預稽烟戶。欲將妹之年貌登

冊不得已仍諾黃請矣。然此番作合，非由人謀，幸勿以為弟罪。伯得書，撫膺頓足，復作書讓仲書，未至而婚已成。婚之日，亮忽患眩暈，草草成禮。廟見時，木主無故倒地，家人咸疑不祥。適年生一女，劉愛之甚，曰：此我掌上珍也。因名珍珍。時有熊耳山人者，善推五行，言多奇中。適游虞山，劉延至家，使推珍命。山人曰：是命能富貴其夫，一生無蹇運。劉喜，乃以己造令推山人。沉吟久之，拍案大叫曰：安所得是命而給我哉？女子坐台垣，有執政王家氣象。鄉林婦安得有是？問命中有子否？曰有二，且生而即貴，已而推亮則搖首曰：此如病肺人，馨香滋味羅列滿前，而欲啖不得，縱使腰纏十萬，亦難享用一錢也。問何時得子？又搖首曰：命中無子。爾時舉座惘然，咸笑其妄。然劉以星家言，每為嗣續慮，有張媪者，為劉乳媪，寡而無子，依於劉。劉嘗私與語曰：癡老年半百，只一女，猶兀兀然朝夕持籌握算，竟不思身後倚託者為誰也。將若何媪曰：俗有先取他姓子，養為己兆而引之者，往往如所願。蓋試之，劉點首。時劉伯兄有子三，季曰金印，始受讀，溫文俊雅，劉愛之，欲撫為義子，乃言於亮亮以劉不敏，心細平時為亮籌畫，無不中，久已奉若神明。劉即庸奴其夫，亦不敢違顏色。因曰：諾，乃治饌邀二劉。時伯歸里已五六年矣，而未嘗一至黃所。劉恐其固却也，私遣張媪致書，大略言妹非私奔，既歸此家，前事宜姑含忍，兄妹之倫，義不可絕。今謹薄具杯酌，為戚里一申款洽。念兄素憐

妹來則愈有光。不然則是張其賤也。妹亦置願無地矣。伯見書不得已乃偕仲往。始與亮相見。宴畢入辭。劉謂伯曰。珍將就學。苦無伴。金哥來此依我。與珍同塾可乎。伯曰。嬰孩不能離母。且徐之。仲聞遽曰。我家七舍可來也。劉未應。而仲即於次日攜子往。初劉之為亮謀也。以伯品誼為鄉里所重。欲故藉以修好。即為後日門戶地。仲則其素所心鄙者。其子亦凡猥不足數。而亮見伯落落難合。不如仲之易籠絡。因反慫恿之。遂留焉。七性暴戾。比長而橫益甚。嘗戲珍。珍怒白於劉。劉撻之。遂宿之外舍。食亦不令同席。任其去來。七乃日逐羣惡少游。虎而翼矣。無何。劉字珍於直塘錢氏。錢藉婁東。徙於虞。翁年五十餘。僅一子。美秀而文。嘗侍其母。出觀競渡。鄰舫則劉與珍也。兩家通問。如里居近接。乃各過船。款語甚洽。錢母歸。語翁曰。黃氏婦固情麗。其女則尤嫺雅淑婉也。翁遂請婚。劉亦以親見故。遂許焉。七忽怒詈曰。父曾囑我勿游蕩。姑將以珍字我也。故撫我。今乃背約別字。將為置我。劉聞怒甚。邀仲呼七而痛答之。且詰以珍字汝何據。七無以應。因謂仲曰。七第欲我娶婦耳。然直言亦何害。乃敢以橫語突激哉。爰以百金為七婚娶。復置莊房一所令居。且以己之倉田三十畝畀之。曰。劉產仍歸劉氏。願汝守之。若蕩廢。無入我門矣。七好博。未逾年而田屋盡售。妻無所依。自溺死。仲亦忌其無賴也。屏弗子。七遂寄身博場。錢生則游婁庠。出贅於黃。劉愛珍及塔。一應衣服之需。

盤飧之奉。倍極豐美。既彌月。生奉父命告歸。課舉業。劉慰留不獲。始欲餞焉。時七為敗類。苦
饑寒。常仰給於劉。一日適遇珍。七曰。珍姊。向問爾幾時招婿。輒怒罵。前日衣藍衫冠方巾者
誰耶。珍不答。又曰。姊夫歸矣。姊寂寞否。珍怒遂入。及晚。珍於寢所覺有異。急出呼父曰。房中
似有賊。亮率僕婦持挺入。搜至床下。得一足痛擊之。賊大號視之。七也。劉忿極。以剪擗其股。
流血盈地。縛而閉之室。厥明仲聞而至。欲投之河。劉不可。令仲錮於家。甫一日。仲妻復陰脫
之。自是七遂欲甘心於黃矣。黃年及周甲。而嗜利益甚。催租索逋。事必親履。碌碌城鄉。日無
刻暇。一日晨起。持簿書。將至劉寢。忽撲地。家人急扶至寢處。日未中而氣絕矣。亮死。劉痛哭
成禮。既殮。七自外至。突入。總帳。憑棺呼爹。為號泣狀。既而呼劉曰。娘。取斬衰來。劉曰。死者無
子。安用衰。七曰。我固子也。劉厲聲曰。汝自姓劉。與黃何涉。七曰。幼而撫我。長而室我。田疇界
我。雖非親生。亦是義子。今黃乏嗣。塔外人能獨享此乎。劉曰。汝今何欲。七大言欲分遺產。劉
怒甚。令僕婦之有力者。縛諸庭。自取白杵痛擊數十。曰。此我分汝之資也。七初出惡言。繼以
不勝楚號。呼求免。遂釋之。七出。且走。且誓曰。必有以報。劉乃集童僕人。給鉦一具。戒以每日
晚。即持此分布四野。伺有所聞。當即相應。無何。果有盜自簷而下。劉急令媪啟小門。於宅後
鳴鉦。四處鉦聲齊起。盜遂驚逸。家人咸相慶。劉曰。未也。乃更坎室之行。道為阱。穴壁數處。中

貯石灰末而承以風車。數日後復有盜數十。蟻身屋後之水門。夜將半。各明火執仗。斬門而入。將及內寢。前導者過坎即陷。餘盜知有備。方倉皇間。壁穴中灰末驟飛。盡眯賊目。乃各棄械竄。燭之落陷者七也。跣足散髮。皂衣黑面。形同鬼魅。劉曰：我固知此獸所為。候天明當鳴之官。珍曰：鳴官恐傷舅氏心。不若縱之。劉乃驅使出。自是里中無七之跡矣。劉連被驚擾。心常恐。因謂珍曰：盜猶可禦。縱火奈何。我當先安死者。即彝亮於湖湖之祖塋。事竣謂婿曰：此不可居。我將依汝。於是先舉什器。運至直塘。遣珍歸。以一冊付之。曰：除汝房中物。餘俱在此冊。囊米二百餘斛。每貯銀二錠。須親檢收。大小衣箱六十有四。各有銀若干。櫃三十七。或貯銀。或貯錢。皆有號可稽。汝先發。我將踵至也。乃傭工百人。連運數日。既畢。劉復徧召鄉里貧戶。飲以酒肉。盡焚其積年債券。且開倉廩。人給米二斗。麥半之。棉花五觔。菽五升。眾羅拜曰：夫人施恩。徧及我等。將何以報。劉曰：報何敢言。第有積粟二千餘石。諸君能為我運至直塘否。眾曰：唯命。時值歲饑。鄉間富室圍穀。每為貧民攘奪。劉反得而用之。不三日而運已盡。時劉本欲即赴直塘。視歷連日不宜。遷徙三日後乃吉。越二日夜。將半而難作矣。先是明總戎李成棟。既降滿清。統兵南下。過輒殘破。所擄婦女十餘艘。為嘉定鄉民所焚。死與逸各半。成棟責兵弁。務掠吳姝。以償所失。旋奉命征粵。乃囑其弟侍母居松江。令麾下某統兵守之。某

有汎卒七黨也。當七受杖而逃。即走松投卒。得近某將。因言任陽黃氏嘗黨逆家私千萬。虎噬鄉里。得數百人。剽之。既除民害。且實軍餉。某乃令裨將率眾由劉河經崑山。至七浦塘而進。是晚劉方與張媪封樓房。處細事。待旦而發。忽聞門外炮聲轟然。響震屋瓦。李兵破扉而入。啟廩廩空。搜房房洗。徧索無一物。裨將恚甚。俄見眾擁劉至。注視久之曰。楨有此不然。何以復主。帥眾以勞而無獲。怒七之誑。即殺七。縱火燒黃居。掠近村數十家。遂擄劉去。張媪從焉。珍聞變驚絕。終日長號。錢翁令子赴松探耗。逢次。即聞成棟以粵東叛降永恩。親屬被收。所掠婦女悉於南京安置。生遂邀劉仲偕往江甯。覓至一都統署。見有遵奉令條。凡逆棟所擄婦女。俱準親人具領。錢喜甚。方欲投訴。適有武弁自內出。錢揖而告之。故弁曰。我本以吳人投旂。與汝豈無鄉誼。乃攜錢手至靜處。語之曰。王爺固有是令。但司其事者為黑都統。非阿堵物不可。錢問所欲。則曰。視年貌以定多寡。美而少者。必需百金。錢以所持不足。遂偕仲歸。珍曰。誠得我母。金何足惜。遂以千金。促生復往。錢至。即覓所識弁。且許事成後。另酬五十金。弁以諸婦女係掌家婆。二太所管。每百兩。例予十金。曰。可。弁即取劉之年貌籍貫去。久之。出謂錢曰。無其人也。錢皇遽曰。余已訪確。何乃無之。弁曰。我亦欲得金。爾豈給爾者。適據二太言三百餘人中。徧詢竟無有。得無誤耶。仲曰。事已至此。果否。乞查一確據。當有以報弁。

躊躇間曰得之矣。疾趨入。有頃袖一冊至。謂二人曰。此確據也。錢閻至末頁。果有黃劉氏及從媪張氏而殊圍標其上。傍註。送入王府如是者。共有四名。弁曰。如何。我不爾誑。錢神呆僵立。仲亦無如何也。嗒然返廬。擬籌別策。乃不數日而劉書至。初劉被擄至松。李母見而悅之。曰。此必宦家女。姑以母事我。行將送汝還也。未幾成棟叛。家屬皆檻送京師。一應婢僕悉置南京。俱聽本所發遣。劉亦墨名籍中。為黑都統承管。婦女三百餘。初至江甯。席棚露宿。幾不欲生。越日而滿洲太太至。蓋王府中總管老嫗也。年已七十餘。髮白如雪。髻簪花朵。衣履皆男子式。善漢語。滑稽多智。至則都統以下皆跪迎之。掌家婆二太上前叩首。恭引至棚。嫗先作漢語曰。諸姊妹無恐。我來作降福符官耳。持不知誰真有福者。乃側身入隊。擇當意者。拽裙使行。令至別所。排列共三十餘人。嫗上下睨視。指曰。彼太長。此略短。甲似肥。乙較瘦。乃去其半。令留者至前。諦視髮膚掌臂。復隔衣捫其乳。十又去七。僅存其五。乃列坐待茶。殷勤問訊。審其音而耳屬焉。一婦聲微窸。復去之。旋起立。語四婦曰。無動。我欲一觀履式。因以指量其履。戲語曰。無乃唐突。然不爾則不見真才耳。徐向一婦微笑曰。塞楞塞楞者。滿語蓋言最好。其婦即劉是也。因顧二太作滿語曰。雅海沁兀律罕。言渠婢令隨去可也。俄擁四婦登輿。進王府。劉持張媪痛哭曰。入此。萬無見珍時。我亦命不久矣。至暮。王宴命四婦侍酒。滿

嫗戒之曰。至王前宜各叩首俯伏。命起乃起。慎母哭泣。致王怒也。已而三婦如所言。劉獨倚左柱。向壁側立。而額光煜煜。時與燈燭光相射。目眇暈微紅。如曉花含露。王見甚異。問何藉不應。問年幾何。又不應。問有夫否。劉忽大慟。曰。我民間寡婦。為李兵所擄。以戀戀於一女。故不遽死。今至此已矣。盍速殺我。我良家女。決不肯為奴婢。聲嗷嗷如嬌鶯。嚙樹。俄以首觸柱。硃然有聲。滿嫗抱持之。劉且備且號。鬢髮盡解。髮長委地。光黑如漆。王憐之。命嫗引去。囑善護持。勿令悲損。嫗遂引劉入己寢。以安之。朝夕進復飲糜粥。糖霜果品。滿几案。劉勾粒不入口。坐卧惟泣。張媪憂之。私語滿嫗曰。劉之悲毀。痛念其女耳。前在松江。傳聞李兵復擄直塘一帶。及今三旬無耗。若得通一音。以慰其念。飲食或可少進也。滿嫗為啟於王。王曰。速令作書。當命疾足往探耳。嫗告劉。乃修書寄珍。首言我生不辰。疊罹險難。河干一送。豈意竟為長別。中言七獸肆毒。唆擄往松方。幸李母仁慈。生還有日。不料呈名春籍。忽又送入掖庭。所以不即死者。誠欲得汝一音。以瞑我目。又云直塘一帶。是否亦遭焚掠。或七獸未遂所欲。致汝家為破巢之卵。亦未可知。我書得達。急盼歸鴻。未言瑩瑩。嫗婦現已密製和衣。滌身自守。倘罹橫暴。願投清風之崖。汝尚自愛。弗我念云。珍接書。且讀且泣。方與錢生議覆。而劉仲適至。反復閱書。作嗷嗷狀。謂珍曰。汝母亦太痴矣。王非他。乃入關時。從龍第一功臣也。下江

甯降宏光平兩浙以懿親典樞務功高威重但得為玉婢亦足安樂半生何必峻拂其意回書宜勸其遇事婉從設使激發雷霆恐我與若俱無噍類耳珍覆書始慰以無恙後云母生兒亦生母死兒亦死情殊依戀而恰無激勸語仲乃私致書盛言王功蓋寰宇得侍為幸又云妹固女中智士小諒宜所不為矧繹昔年熊耳山人之言或者事有前定未則告以房燬無歸婿家究是外人難以倚託不如自於根枝使余等亦叨庇蔭乃於書尾署伯名而已附之先是劉如玉為發書心頗感之己日進粥糜及回書至知珍無恙色為之喜繼聞兩兄書沉吟久之忽愠曰此非伯兄言乃劉二所為耳豈四十金未滿渠願以故又欲賣我乎越張媪火之無何王妃忽刺氏薨京邸訃至設位中堂按滿清制本旂婦女窻下者例合哭臨在外則穿素而已滿姬語媪媪以告劉劉曰業嘆此間飯曷敢不遵大典乃縞衣練裙而出王適遇之於中霽淡冶若仙飄目時光恰兩射王曰此非觸柱求死者乎何亦雅素乃爾因語滿姬以劉骨相不凡當善視無與羣婢為伍自是滿姬侍劉愈謹啟事輒跪未幾王賜劉滿漢衣履各一箱越日又賜優十觔東珠百顆劉若弗聞旋又賜首飾一篋宮扇二柄荷包帕各四件金銀錠各一盤滿姬跪告此皆王爺所賜意良重又曰王賜宜叩謝劉惟偃卧俱置不省是夜王命劉侍寢劉乃大號曰果也將婢妾我也我難婦耳生長良家豈有罪而輸為

城旦者任彼朝朝暮暮耶。王聞卽已滿。姬妹訝之。私謂張媪曰。劉自入府以來。王待之者。恩禮亦已備至。無論饋食沃盥等事。俱不令值。且又賞給稠疊。實為非常異數。王尚無子。今忽刺氏亮。羣婢中亦無寵幸者。而獨注意於劉。此大福將至時也。乃劉尚有不豫色者。何哉。媪曰。劉此何。抗居家喜南面坐。諸婢僕屏息聽指揮。惟謹。今一旦欲其卑躬屈膝。辱充下陳。宜其甯死不願也。滿姬微會意。乘間語王。王遂以金鳳花冠一品。命服為賜。既宣命。張媪低語劉。王今尊禮至此。宜若順從。時劉雖仍不言。而手受冠。服顏色甚和。滿姬從屏隙中窺知其隱。卽宣言朝廷定例。凡正室不孕。而側室有子者。奉聞後卽冊立為她。今服止一品。夫人耳。或尚有貴於此者。至夜。王以御賜金蓮燭炬。導劉入寢。劉願姬謂。獨忘拜謝天恩乎。王卽命移炬中堂。王中立。劉立其後之左。偏齊行九叩禮。至寢。劉徐却冠。易補服。向王三拜三叩。起。王見其知大體。有淑媚風。喜極。幾無復平時威重。是夕。劉侍寢。次日。王賞滿姬錢六十緡。姬率閩府男婦三百餘叩賀。劉出白金四百兩酌犒之。衆皆感悅。有貂璫二。陳某劉某。係故明宦者。年皆七十餘矣。王以二監給劉。聽使令。劉乃作書。飭令賚赴虞山。以慰珍曰。汝母受王恩禮。此身已不及自持矣。持念汝父生前。初無一語忤我。以故覆水之勢。雖成而故劍之思。猶切。今為之計。莫如訪立本宗。授以羊產。繼宗祧。而綿血食。既盡生者之心。卽安死者之

體善體我意是誠望汝來監乃先朝內臣同日歸旂者須加禮款使知汝非寒儉家兒也東
珠十顆可為甥孫帽飾京樣手鐲一副俾汝佩之如見我耳書發二監未至錢生先偕劉氏
伯仲赴江甯探信適王以浙西民叛奉旨往撫三人得徑入王府劉見之涕泣不能發聲得
劉仲慰勸始漸破涕為歡既而滿嫗奉茶至皆跪進稱舅爺姑爺時劉伯猶未知改節事見
妹盛飾華服及頃指氣使處心甚疑之私以問仲仲曰妹已處於王宮又何疑伯大恚作書
絕妹拂衣竟歸仲閱書笑曰腐儒語耳何可令妹見遂火之既而錢將告歸劉私語之曰我
欲玉成汝名汝入京姑勿見我且我行踪南北亦尚未定為語珍探的後音書頻寄可也錢
遂歸仲獨盤桓府中結劉監為宗人共處值房未幾王自浙歸仲上謁得司府中出納冊俄
王內召還京途次濟甯而劉病氣逆登輿輒嘔王檄中丞召醫診視或言濕阻或云水土不
服各擬方進奉劉閱未畢即碎而謾罵以王未解吳俗語乃強起擁被坐牽玉袖於卧所附
耳曰我病嫩耳羣奴皆用利導之劑豈欲以之殺我耶王聞大喜越數日劉體果安乃就道
抵京陛見回奏一二軍國事後上問王年已四十何尚無子對曰臣在江南納本旂婦劉現
有身上喜曰男也則亟告宗人府以聞未幾劉果生男上聞賜人侵果品等物太后復賜洗
兒錢百萬例冊劉氏為某王妃適遇皇太后萬壽劉遵例統率福晉等

福晉領國奉國入宮
將軍妾皆夫金入宮

慶賀。太后見劉問曰：聞某王妻美，此其是乎？又問年幾何矣？劉以三十有五對。太后曰：如二十許人耳。更問何籍？及進身始末。劉以實對。曰：不意民間乃有此婦。翌日，又賜錦緞百端、糖果八盒、黃金四十錠。王帶一團。時朝廷新開科舉，命王監閱國學錄科試牘。劉得偏視諸卷，則其婿錢生與焉。錢以拔萃生入京肄業，因遵劉誡不入見。劉乃語王曰：頃見諸生錄科卷內有錢姓名沈瑩者，我婿也。王不語。及榜發，而錢已以經魁獲薦。明年復成進士，選部曹。始因公詣王第，王即延入中堂，令劉出見。劉服黃錦袍，垂紫貂皮銀鼠帽，首珠額，翠翹，皂靴，款少喜形於色。謂錢曰：我思珍久，近已為之置宅一區。汝歸可速挈眷來。仲兄現患消渴，恐不測。汝當偕之還。錢遂偕行。半塗，仲兄護櫬歸，即携珍至都。劉年四十，復生一子，嘗為漢裴安車。裴蓋女從百餘，過珍寓，歡宴累日。一日謂錢曰：我昨夢處故居，簿書文券積几案，宛如黃氏盛時，覺而戚然。我前以立後囑汝，今得之否？錢曰：黃自塘市，遷任陽之大橋。三世單傳，別無支派。其先自虞而崑，復自崑而虞，系皆無考。故雖徧訪，以示求後意，竟無應者。劉聞，悵然。姑出金錢，遣紀綱赴泖，為黃修墓道，且擬置田供歲祀。至則墓木已刊，四望平曠，野水黃北，域無由別識。蓋兵燹之餘，已毀其墓為河道矣。僕乃封土三坏，藉以覆命。時珍已舉三子，劉囑以次甥嗣黃。俟其長成，即於遺址營第，奉黃祀。珍諾之。乃不二年，而錢次子死，更命其季。

季又瑒黃遜無嗣。劉後安富尊榮。又二十年薨時。歲己酉。甲康熙癸丑。張媪以年老南歸。為述其顛末如此。曩余客金閶。嘗於殘書鋪中。得是事稿本。前後百紙。草率多謬。標面曰。過墟志感。首篇即載任陽事。後半類日紀。而無撰人名。近閱紀載彙編。知曾采輯。則直目為過墟志。并有野西逸叟序。然係琉璃廠排板。刷以牟利者。僅賞新奇。一過即已。故其篇雖較稿本為約。而亦未遑剪裁。余以其非見聞所習也。因持芟繁就簡。且別其目為孀妹。遇其間雖儘有點竄。而無失本真。將廣其傳。後遂鐫入是錄云。

兩蒼氏曰。隨事安插。經緯井然。無拉雜掛漏等病。以故頭緒雖繁。叙次恰一絲不亂。一二點染處。復得事外達神。倏然改觀。與舊本迥殊霄壤。試於香清茶熟時。靜讀一過。如龍聊齋副墨也。

九老會

嘉慶九年八月望。李味莊觀察。廷敷。招邑中耆老。飲於署之嘉蔭堂。座首為凌鶴輝。年百有四歲。次沈文圻。百三歲。次鄭盈山。百一歲。次全志南。九十一歲。又次陳熙。胡文綱。喬鳳山。陳叙東。桂心堂。俱八十以上。稱為九老。觀察設盛筵。殷勤進爵。則皆歡呼暢飲。聲達戶外。日將暮矣。李見諸老興猶未闌。因曰。公等能卜夜乎。僉曰。能。乃遂高燒絳蠟。重倒金樽。珠覺興豪。

於畫堂中時懸文符詔所畫山水軸後跋百餘字作蠅頭細楷主人曰諸公目力尚能讀書中字乎沈曰讀則互相成誦請各書一紙錯一字浮一大白李公大喜各授紙筆內惟凌與陳以不能辭餘皆摹寫無錯觀察深為嘆賞酒罷時漏已三下而皆無怠容是會也同邑得百壽者三俱矍鑠無衰狀真一時盛事凌翁家與余鄰近聞之先君子云翁身短微髯年逾百歲貌若五十許步履飲啖如少時嘗於浴肆遇一人鬚髮皓然出浴時偃僂喘息翁屢扶掖之乃謝曰三代尚齒喜君猶有古風然君等壯年殊不知老來之苦也翁曰長者高壽幾何矣其人曰七十稱古稀僕幸及之耳因亦轉問翁歲翁笑而不答問再三有告者曰此即九老之首凌某也今百五歲矣其人甚慚衆各撫掌翁亦為之莞爾云

兩蒼氏曰壽居五福之首一邑中同時得百壽者三此真盛事又聞老人有少意者壽無量觀凌翁於浴肆中扶掖長者儼居弟子之列則其得壽也固宜

華十五傳

華十五皖孝廉也佚其名遂於古學好發奇論而恃才傲物詆及前賢并疵當世之嶽立者或以經義叩則曰汝輩如螻蟻具足不出戶庭乃欲與鴻鶴談雲漢事耶鄰邑有某生富於文意頗自負而嘗慕孝廉名以為非華不足與談所學遂挾生平傑作而造焉值華卧方起

遂訖而出。生亟置稿於案，趨前揖之。華瞠目四顧，若未之見。頃之，僕進盃茗，而不及容。華從容盥沐，旁若無人。洗畢，即以生稿抹其桌。生怒不能忍，曰：「某文雖鄙，字不當惜耶？」華擲稿曰：「正嫌其有字耳。若以古紙舐，售人看水不略重乎？」生取稿恨恨去。其玩世不恭，妄自尊大，有如此。後華逸出鄉里，絕音耗者將十年。僉疑已死。一歲，又值開禮闈，榜發始傳。華捷南宮，及魁墨出，同學讀其文者，咸詫異曰：「此果華十五作耶？何索索無生氣也！」先是華登賢書，聲稱藉甚，有相士見之，曰：「此君額有挺骨，稜角太露，雖得文名，異日恐不免淒飢。聞者咸嗤其妄，及華以兀傲之故，僉惡其不近人情。親友不相顧問，以致厨斷炊烟。華始憬然，恐應相士言，時有宦越之戚，華擬投之，匆匆就道，不計資糧。程未半，而囊金既盡，并罄衣裝。復值嚴寒，枵腹行村落間，朔風侵骨，兼遭雨雪，路滑泥濘，遂陷於淖。良久始匍匐入一古廟，僵卧神龕下。旋有數丐提筐入，叱曰：「此我儕地，汝垂斃者，何卧於此？」華不語，即被拽出，棄道旁。適有某翁，過其處，憐而舁歸，飲以溫湯。一日夜始有聲，詢為孝廉，益喜視。華因凍血凝結，徧體赤腫，數日從腫處悉潰成瘡。患三年，病始愈而啖持健。每餐能盡飯一盂，肉一器，又半年，軀體頓偉。迥異昔年。因拜翁而謝曰：「僕受深恩，無以為報，願授諸郎君業。」翁喜，遂館於家。凡五年，始終無間。內而婢僕咸稱其德，外為鄉人所敬禮。以是翁益重之。迨過春闈，資以多金，應禮部試。

錄之編既愛斯作又歎其舊稿之盡亡也爰序其由而代存如左其文雖極富貴而抑塞磊落實深顛倒賢愚之慨此皆不平之氣猶客嘲天問於遊戲中寓感喟者也有識者自能賞之母多贊云

有唐宏農郡王田史字同貝漢武安侯蚡之後也祖犇元宗時領千牛衛父驎以勇聞安史亂郭令公召為牙門將以麻角林功歷擢蜀川道節度使遂家蜀娶米氏生史生時米夢神錫異貝千萬故字同貝史少不慧雖讀書嘗以富貴我所自有故不終帙使棄去然有口辨作事敏達析秋毫持好游獵馳逐狗馬不少疲有青城山道士過之曰郎君此亦何樂余相君福甚厚願第數十年富貴耳如願事凡機者合得長生術子欲之子史自以世家子方尚豪侈數十年富貴何不樂而欲以長生易之子乃不語道士察其意曰使郎君大富貴又登仙何如史應曰苟如是復何求道士曰然則子自勉之斯已耳遂微笑去是時史年及冠父以其縱初不喜母夫人特憐之乃與驎議欲為史婚夫人故陳倉人也時蜀亦有米氏舊家米中曰米仁者官龍武軍長史以功拜涇原道監察御史奉冊迎上皇來蜀因亦家焉夫人言氏無子生女曰珠稱國色米夫人欲之而難其辭因託宗誼時與言往來頗得乃示意仁固不欲曰是持田舍家兒耳何可配珠女言曰不然田家郎四體敦崇頭角嶄嶄他日任重

致遠當無出其右。倘必欲王楊盛駭其人。雖才然自後言之。或非俊物。且彼家既為節度矣。何求全也。仁於是亦首肯。田遂以黃金千鎰聘焉。禾中米氏故世貴。積資雄天下。而仁富又甲一族。婚有期。童隸采買四方郡縣器物者。趾相錯。紀綱僅千。侍婢百。皆衣文繡。五人為隊。隊間其色。奩贈計萬億。福龍多。紫檀香栴。雕鏤如鬼工。其妝臺蓋碧玉也。圍以珊瑚。闌雜嵌百寶。盤盂等物多金玉。及期。史行親迎禮。既真。雁米氏出。九華雲。蟠游仙。錦步障。施之如複道。然直達田所。障間悉綴珍玩。火齊木難瓊枝。碧樹光采四溢。明珠瑟瑟懸障頂。如繁星。里許間一夜光明。豔又如月飾。沉香葦為花。與笙蕭沸天。燭淚如雨。道撒金錢。結福緣無數。典過肩。蘭香經數月不散。史於斯時如墮雲霧也。史既得米資。益自營運。躬親機杼。不數年。陂池田園膏腴盡。蜀水復得。害金萬萬家。愈饒無何。母夫人卒。父亦繼薨。史自稱留後。唐自肅宗後。節度多世擅。代宗八年。遂詔史實領蜀川。節度使訪曰。生兒不用識文字。闕難走馬勝書史。田家舍人年未壯。富貴榮華誰復抗。又謠其得婦之盛曰。龍宮嬌女嫁塵世。四海寶珠都輩至。由是中朝貴人如元載王縉魚朝恩輩。皆願交史。魏博節度田承嗣亦約為兄弟。多藉史通關節者。餽遺亦日富。初史意頗暗暗。自奉既厚。輒妄謂他人當亦爾。每遇親知道。恣若漫不着。作何狀。及擅權利下。不能欺貴游子弟。道出蜀川者。史必盛供帳。玉筋舉饌。金鑊

注香別皆有贈。或多干請。悉與周旋。無吝諾。故譽史者。日彤章。奏時國初定。幣藏皆虛。有諷
史輸粟千斛。貢於朝者。遂授史朝散大夫。上柱國。賜紫金魚袋。史表謝。益獻錢百餘萬緡。乃
加史中書令。同三品。兼權蜀道鹽鐵使。知諸權務。東西川租庸大使。先是蜀有碑刻。曰蜀水
清。田氏新。蜀水濁。田氏熟。及史時。蜀水果濁。而田氏日貴。顯氣蒸蒸。如釜上。既權諸權務。搜
羨餘。日私萬計。宗族賓客。充溢三舍。要皆為史主會計。不能虛糜糜粟。人亦因得主一事。私
毫末。奴隸皆可致富。故亦不顧廉之。惟掌書記平倩。泉史憂妻。皆出其手。因以上賓待。攝平
先生。先生嘗語所知。言史雖不讀書。而遇文士。頗有禮。願見者。皆以好語慰遣。謂若輩利我
財耳。既不當其意。復不假以顏色。是取怨也。人乃愈莫測其涯涘。投詩文為誓者。日數千。史
悉投巨篋中。署以為酷海云。平倩。泉者。名泉。以母夢濯錦色。泉而誕也。美姿容。好讀書。工詩
古文辭。下筆妙天下。四方士以才子稱者。咸曰是必平倩。泉矣。史每言我視石崇。王愷。如奴
子耳。泉則曰。我豈不能以屈宋作衙官耶。然泉數奇。連不得志於有司。以是鬱鬱。又貧。故惟
文章自娛。史迂之。嘗邀與飲。泉既失意。亦樂借一杯。曰。我豈癖於書哉。使心計稍粗。其肯當
蟻唱渭城乎。人以此既惜泉之多才。不偶而益慕史之富貴也。時史年已壯。珠從夫貴。亦封
蜀國夫人。夫人固知書工詩。作簪花小楷。尤妙。居未中。才女名噪咸里。既歸史。乃不復作韻。

語。史多內寵。而夫人侍妾媵尤和。第夫人自有林下風。雖富貴。不屑道。而史每矜之。嘗以一冊示夫人。計開珊瑚翡翠瑪瑙水晶象牙等器三千餘件。龍腦香五十餘兩。麝臍百二十兩。沉香檀各數十擔。空青九枚。明珠五十餘斛。大理石屏五十座。床几各百。雜嵌寶床百七十。珠燈千。珍鑲箏瑟樂器二百餘件。辰砂五百兩。紫礦千餘鎰。白礦三千餘鎰。赤金腰帶及杯盤等刻花者千七百件。素者千三百有奇。羊脂玉屏風及玉帶玉山玉琴玉人玉斗筭玉樹玉瓶二千五百餘件。祖母綠佛像九通天犀帶三黑貂元狐銀鼠金雀等表合二三百件。綺羅綾錦織金采緞合千餘束。火浣布百餘尺。黃金錠九十餘萬兩。白金錠三千八百餘萬兩。碎金銀八十櫃。參著共九百餘兩。厨中黃雀酢百二十甕。他物俱稱是史。每季必造一冊。權出入課盈虛。此新造者。而夫人殊不為意。曰。以君為俗。誠不誣。妾奩中亦有籍。君欲觀乎。史曰。諾。夫人逆知史所好。惟此金玉錦繡也。因不與較。特取一雲錦迴文邊金絳細闌白地光明絹手卷。與史。開卷則載古銅龍耳等鼎。獅象寶鴨等壺。大小各數件。蛇紋古琴十餘張。古硯二十餘方。鍾王懷素褚虞等墨蹟。及小李將軍吳道子等清秘諸名畫。各數十軸。楷錄經史子集書八千六百三十五卷。史閱未半。即笑不止。曰。夫人誤矣。夫人合偶平情泉。不合與田史字同。見者偶也。夫人曰。平情泉何如。曰。平先生酷嗜此。我以為不可衣。

食嘗目為駭。不謂堂堂蜀國夫人乃亦爾。我故戲言耳。夫人微溫。繼亦笑。即掩卷呼侍婢。取內閣第十一房鑰至。則偕史入。婢請所向。夫人曰。既入寶山。何地非寶。信手開一香楠厨。內有牙牌。檢視之所載。若龍綃衣也。紫絳帳也。却塵褥也。辟寒屏。游仙枕。照病鏡也。占雨石。鳳首木龍角釵也。靈光豆。上清珠。香玉辟邪。七寶硯。鑪也。杯有自暖。鼎號常燃。以及醒醉之草。瑞華之炭。迎涼之扇。瑗玉之靴。凡諸珍異。光煥一室。其物各具種種靈異。或能顛倒。炎涼。厨側懸珠屏風一。上刻仙山樓閣。古美女二十四。有磐旁綴。非玉非金。擊之自成仙音。屏上美人。遂下屏歌舞也。史至。是舌橋不能下。夫人乃笑曰。田舍人。我豈妄哉。今竟何如。史攝衣謝。乃不輕自眩耀。而史富貴名益藉藉人口。聞於天下。史有園內外各一。外曰延禧。花木秀擢。山水清雅。亭臺軒觀。位置亦妥帖。陳設雖富。猶不失之俚。以泉嘗安硯於中。時為史潤色。史又持以是娛賓客。故不措意其內。園曰滙芳者。則窮極華美。為史晏游。所有水仙觀。凡五楹。楹三層。以沉檀為椽椽。金寶為戶牖。四周有池。砌以文石。池中青蓮花皆異品。冬夏不凋。香間數里。或飾綾錦為鳧雁。每亂真觀中。織珠為簾。刻玉為几。下鋪錦茵。上幕繡帳。四壁雕香木。為花榻。梯級二十四。以五色漆描花鳥人物。登最上層。可盡內外園勝觀。華奇石為基。繪以紅欄。欄外跨九曲石橋二。蜿蜒如虹。兩岸植梅梨桃柳之屬。枝枝披拂。下繫木蘭小舟。

四其南有廳事五與觀相對時令女優演長生殿諸劇也周翼以十二院處姬人雖參差錯別而有曲廊通往來其於水仙觀若星之拱斗觀後羣房三十六處侍婢上有閣道東西通一邈迤可達外園一近蜀國正寢園尚有溫泉二其一天成其一乃坎埋硫磺為之史嘗與羣姬浴其中蜀故有野蠶繭亦可為衣史令人織成小方幅供後房廁紙歲亦費金鉅萬其奢侈類如此然史性特異雖好狗馬聲伎而鑒別往往出意外嘗得一馬雖驥要云絕塵物而史愛惜過常駒又以三千金購一姬樊姓小字瑩貌亦常人特善修飾睽光眇視多媚辭蕩態復解歌舞能為靡靡音實則後房之色如是者不數也而史獨寵之甚當田承嗣與薛嵩構難欲倚史為援也曾餽史名馬二曰神智聰曰如意駒皆起卓志在千里而史殊未之奇美女二曰春燕曰秋鴻吹氣勝蘭光艷如朝霞映雪雖夫人亦以為不及且通書史故夫人絕愛憐之賜春燕紅玉古杯一晉永和翡翠盤一秋鴻則漢五鳳年黃玉水注一屬賓國銅龍苗一而史待之殊落落不三年二姬繼殂其馬亦以駕鹽車過九折坂墜死人以是服史謂有先見獨夫人尤之曰君為節度軍府事重茲過雖細然脫顛倒人物盡如此即不為國計獨不為身家地乎史唯唯蓋史為人雖稍愎然能權輕重言有切於利害者不敢非也德宗建中三年冬十二月李希烈叛王武俊田悅等應之悅故史之宗也時有下舍客進曰

公且亦族矣。猶洋洋如平時乎。史驚屏人問故。客曰：公第以門蔭得官。雖當納粟獻錢。要無大功於朝。今藩鎮多事。而宗人悅。又稱魏王。公即不登叛黨。朝廷必且疑。疑則殆矣。又公所交元載輩。皆已敗。少聲援。倘不乘時自結於天子。公猶能以富貴自雄乎。史心動。入商於夫。人。夫人曰：固也。妾亦慮之矣。曰：將奈何。曰：是非妾所知也。第客既能為是言。必有奇計。然非多予之金。恐其所使亦不能成事。又平先生雖以文士自居。其人實有經濟才。君藩畿庶政。頗井井者。平所佐也。然則君第如客教。并屈平先生副之。蔑不濟乎。史意決。乃先見平。告之。故出遂揖客而言曰：客來前。客能為是言。誠奇人。必能濟我事。然意客必非赤手可為也。吾已具金八十。篋珠寶。二囊。任客所用。吾當更請平先生副行。客聞意若甚。詭即大言曰：孰謂而公碌碌哉。遇大利。害須臾。決策微特慷慨。乃爾。其部署又若素定。雖然。其言殊不似公。史不得已。以夫人告。客乃頓首言曰：夫人知我。敢不為女。留侯。効命。趣來。裝。遂偕平先生疾挾多金。馳去。去後數月。無耗。明年。朱泚據長安。德宗奔奉天。客益香。然繼西平王李晟復京師。諸逆或反正。或投首。朝廷方錄人。過。夫初以天下亂。史又承客指。閉關自阻。故蜀文報缺。如。至是始有所聞。日惴惴。貞元二年冬。朝命忽下。詔曰：咨爾田史。遠居蜀道。時貢厥誠。值國家多難。爾獨不憚馳驅。四年中。三詣闕廷。除表獻金穀數百萬。外復佐西平王軍。夙夜殫瘁。屢

成大勲如斯忠勤殆無以過使藩鎮盡如卿朕復何憂今特進爾爵為宏農郡王加太尉賜
鐵券食封萬六千戶班次於西平王妻米氏誥封宏農郡君長子芳尚瑞昌公主世襲公爵
次子蔭尚安昌公主兼神策行營節度長女瑜冊為皇太子正妃以明年來國用示朕賞功
酬庸之至意河山不改盟誓永新爾尚敬承朕命毋忽受詔極錯愕而又不可問詔使去
史方令人作表謝忽報平先生偕客至史喜倒屣迎之各道故始悟皆二人所為初客挾多
金賈湖湘間不半年獲利甚鉅平先生則疾走京師為史書謁盧相把獻金珠時朝廷果有
疑史者藉是得無恐客復求一貌似田史者偕平先生教之禮容及史家世興元二年自賈
所假田旗幟印信輸粟六十萬斛賁行在并挾偽史覲王上喜溫諭慰遣乃悉餽朝士之居
要地者退益為賈貞元二年秋偽史又入朝表獻錢二百萬緡征衣二十萬件平先生復為
疏陳時政得失又為書敘考功郎陸贄贄深善之三年春客覘知逆勢已覺則盡所有助上
勞軍平又為偽史表請赴李晟營自効贄贊之乃特詔史參李晟軍不數月復長安復佐討
李懷光亦平之寶皆平與客皆左右史也偽史者本無賴事既成多所要挾覲非分嘗醉後
妄言客恐平乃上表請歸藩得旨疾行至半途乃搯殺偽史其事故得終秘旋有宏農王之
詔也史至是始大喜過望乃宴二人酒半且謝且拜曰微二君家已破矣何王之有今請與

二君為兄弟富貴共之客大笑。掖史起。漉酒言曰。公休矣。如公言亦大佳。願念千百萬金在手。脫欲富貴。盡自取。今事定論功。吾二人固應受上賞。然非君夫人贊成信而不疑。則亦無能為。且吾二人處公門下久。公於僕更未嘗有少恩。平日貴游何在。及事急。獨一書記與一下舍客出。奇冒險為君立大功者。亦以世人多肉眼。欲令知貧賤中固有奇士。又謬承賢夫人如故。不敢不効力耳。猶幸不辱命。自今伊始。如僕等者。願明公少加意則幸矣。無以富貴為也。史聞大愧悔。乃不復有意氣。而客與平先生皆酣飲盡醉。史既肅客寢。即以客言入告夫人。夫人曰。信。願有客如是。固非君所識也。且客將行矣。當盡心於平先生。先生有母。必不偕及旦。史送客。客果逝。平先生徘徊間。史即前揖曰。客與先生皆人杰。史始識矣。客今雖去。幸先生留僕。即不敢以真土汚君。願君尚有母夫人在。欲安之。平惺然起。握史手曰。公言何忍。中如是。乃居賓館。如故。史敬禮亦益至。年餘。其母卒。史為營葬極厚。平乃挈一子。託史遂入青城山。不知所終。自是史安富尊榮者。又十年。適五月初度。上賜予甚渥。并詔公卿欲為王壽者。皆許詣蜀川。史子女既與天子為姻家。尚有四子。其一亦為郡馬。一娶郭令公幼孫。一為西平王婿。三女皆配顯倖。是日。麟袍隊。燦象笏。床盈度。下將校皆錦衣執戟。門建旗。旆堂。羅鐘鼓。威儀之盛。無以復加。車馬之聲。百里不絕。及酒闌。史方秉燭。檢閱諸屏軸。五采。

焜耀間。忽聲歌起。曰山川滿目淚沾衣。富貴榮華曾幾時。不見至今汾水上。年年惟有雁秋
飛。此水調歌李嶠作。明皇幸蜀時。數為真才子。時適優人肆業及之。史聞大不愜。乃頗憶青
城山道士言。問語夫人。夫人笑曰。君於此事終無分。第領現在之富貴。可耳。後月餘。前道士
忽至。容貌如舊。笑曰。祝壽來遲。幸勿罪。別來忽忽。近知君頗念我。大不易。史即叩得長生術。
道士曰。晚矣。乃出丹丸五十顆。贈史曰。自此歲服一丸。丸盡。君亦百歲矣。人苦不自足。使人
盡如君神仙。亦不足慕也。平先生與客皆無恙。囑壽聲言訖。即不見。史自得丸。既富貴。又壽
考。以功名終。子孫至孟蜀時。猶貴。其所居。因藏富久。樛棟為金銀氣所蒸。皆作紺碧色。云
唐史臣曰。富貴之於人。甚矣哉。史承門蔭。席未資。功業都假人手。初以金穀易節。旌身潤脂
膏。如賈三倍。斯已奇矣。忽胙茅土。班儕郭李。下人主一等。是雖客之力。獨非史之福哉。而尤
異其得賢夫人為內助也。世不乏王侯將相。要非安坐。可致茲。既盡富極貴矣。而又兼秦王
漢武之所難。伏樂百年。則如史者。神仙且慕之矣。史復何慕哉。平先生輩。雖才然非挾多金。
亦難成事。因慨世之賢豪者。流縱飽詩書。飫仁義而一。無憑藉。終將徒手。呼自負。益信勢位
富厚之不可忽也。有如此。雖然。史嘗言富貴自有。知所成就。皆其本然。不能有二。抑凡富貴
利達時。至乃來耳。士當伏處時。不貧且賤。無以勵志。於以見二人之為史謀者。不過借以見

長。而其不自取者。非僅。敝屣視之也。蓋直安於義命矣。客言貧賤中有奇士。洵然哉。洵然哉。雨蒼氏曰。是余十五年前舊稿也。自遭寇亂。篋藏諸墨。業皆蕩為冷風。飄為濛雨。此如死灰復然矣。原稿尚有浙友洪君子安駢體序文。及同人題評。茲皆佚去。良可惜焉。至傳所由成。已得毛文序。悉特不意區區篇牘。而若存若亡。忽離忽合。茲竟得登梨棗。異於覆醬瓿。是雖緣有前定。或亦由金銀氣旺。藉致筆墨靈長耶。馬齒日增。豹霧未散。附誌數言。倘深慨想云。

星墮地震

道光丙午。新秋後數日。夜將半。忽有大風驟起。勢如山崩地裂。時伯兄也山卧病。大姪女侍疾未寢。風起時。適以開牕傾水。的見紅光一團。其大如盆。赤氣四射。疾若飛星。自北而南。後有流星萬點。隨之以落。其聲如雷。地即大震。室中諸器。盡皆傾覆。時聞人喊馬嘶。家家扶老攜幼。開門奔避。蓋慮屋宇之坍塌也。喧呶竟夜。天明始息。未知何祥。

籤驗

咸豐癸丑秋。滬有會匪之亂。余挈眷出避。居離城三十里之華涇鎮。鎮有城隍神廟。前有三楹。上供關聖像。因偕同人登樓祈問。嘗得籤語云。花開花謝在春風。富貴窮通一夢中。聚眾

害金有盡日。到頭萬事總成空。時方孟冬。或云。花謝春風之窮。來春似可復城。余謂城陷在秋。恐未盡花開之義。末有成空二字。殆言城空。春為歲首。或者復在春初耳。時吉中丞方調兵進勦。意此小醜。可指日殲。而逆眾抵死抗拒。相持至甲寅秋。猶然未下。吉公因會同西兵督飭民夫於城外。更築圍牆。以斷接濟。賊苦糧盡。乃乘除夜。兵勇無備。開城而遁。逆首劉麗川。為亂軍所殺。悍賊陳阿林。林阿福。潘小鏡等。皆逸。官軍於乙卯元旦入城。始知花開花謝者。賊踞城一十八月。得度兩春也。第三句正言糧盡。末句正應元旦復城。籤語之驗。絲毫不爽。

又同治癸亥。余欲延嘉定孝廉童子佩曾蘭。課讀兒輩。議未定。時案頭適有岳慶山樵牙牌數書。因姑卜之。數成。得生老病死。人之常理。天高地曠。有窮期。人不虛生。斯可矣之句。初以語與事了不相涉。且余素慕孝廉品學。以故信而勿疑。不意開塾僅三日。先生竟以微疾卒於余家。始信數由前定。良非偶然。

聖治丸方論

夏令暑熱炎蒸。濕濁上騰。人在蒸淫熱地中。設或正氣不足。最易感病。矧南方地卑氣薄。更多中痧吐瀉之症。推其致病之原。或過於貪涼。風寒外受。或困於行路。暑濕相干。或口腹不

慎為冷膩所滯。或飲食不節。使輸化失宜。或感時行疫癘之邪。或觸穢惡不正之氣。皆能致脾土不運。陰陽反戾。升降失司。卒然腹痛。上下奔迫。四肢厥冷。吐瀉並作。津液頓亡。則宗筋失養。故足攣筋縮。先起兩腿。或見四肢。名曰霍亂轉筋。生死瞬息。年來此症大行。我邑地窄人稠。互相傳染。甚有一家數人。而同時告斃者。深可畏也。茲故不揣鄙陋。爰擬一方。名曰聖治。入夏可預先備用。如遇疫癘時行。痧暑並觸。或感穢氣。或入病家。心懷疑慮。胸覺痞悶。時即以一九入口。藉以解穢却邪。勿亂其氣。方用正號仙居野朮烘燥勿令焦黑二兩。真川厚樸二兩。白檀香研細末一兩。降真香研細末一兩。新會皮鹽水炒二兩。以上五味。再同研為極細末。以廣蒼香六兩。煎濃湯。泛丸如大黃豆大。每服二三丸。細嚼和津嚥下。按朮味甘能和脾。苦能燥濕。定中止嘔。扶正却邪。開胃氣以除積飲。故用以為君。樸苦辛。能瀉實而化濕。平胃調中。消痰行水。兼治瀉痢嘔噎。陳皮為脾肺氣分之藥。能快膈導滯。宣通五臟。並可除寒散表。故用此二味為臣。檀香調脾利膈。正氣驅邪。降香能辟穢惡怪異之氣。故用為佐。使養香稟清和芬芳之氣。為達脾肺之要藥。氣機通暢。則邪逆自定。故用為引。其曰聖治者。以聖人有治病治未病之旨。蓋思患預防。莫若服藥於未病之先。使輕者解散。而重者化輕。未必非却病養生之一助云。

童菽原曰。是方出而修合者頗多。服之有驗。藥似平易。而其詳審氣味。精悉功能。足稱盡善。固非泛然者所能企及也。

褚復生

邑志昔以藝術著者。如璩君瑕之畫。楊伯立之詩詞。陳悟泉之數學。董杏芬之仙術。皆挂人口。而褚復生士寶。又以拳勇稱。褚居西郭。家素封。自幼負膂力。好技擊。既長游學四方。與畢昆陽武君卿為友。遂精槍法。橫矛飛赴。旋轉如風。名曰四平槍。數百人莫能近。福王南渡。以兵部員外郎何剛薦。授伏波營遊擊。未之官。而南都破。遂終老於家。其技不輕授人。得其傳者。惟王聖善。池天榮二人。池又傳於浙江提督喬照。同時邑有獨骨張擊者。虎頸版肘。力舉百鈞。橫行市廛。恆為商旅患。眾請褚除之。褚曰。試觀其技。於是眾商設席。延張。褚亦赴焉。酒再行。褚挑以微語。張自誇其勇。酒酣起舞。攘臂作格。拉勢。褚徐徐以著點其胸。曰。子盍坐而言乎。張遂坐。終席默然。褚亦無語。頃之張辭去。眾謂褚曰。渠傲睨若此。君何不交一手。褚曰。彼若稍遜。猶可活。惟以驕故。今必死於途矣。眾猶未信。次日聞張死於亭橋。徧體色青如靛。乃共骸服。蓋褚運神功。中人要害處。則於三時之頃。傷即入骨。能致死耳。今城西隅有褚家墳。其子孫猶聚族居云。

兩蒼氏曰。讀稍遜。猶可活語。如張仍自死。而非死於褚也。叙褚生神武處。亦蘊藉得宜。
測字奇驗

自星卜相而外。又有拆字之術。昉於宋之謝石。亦能決禍福。斷榮枯。我滬擅其能。而有驗者。乾嘉時。有沈衡章。問休咎者。趾相接。有犯越獄宵遁。捕役往問。拈得一鸚字。沈曰。鸚鵡能言之禽也。舌慧而身不自藏。卒為人所羈繫。且鳥而嬰羽毛未豐。其能遠逸乎。去此當近。速捕可得。問往何方。沈瞥見雀跨後簷。曰。可往後面坑廁中覓之。如其言果獲。邑侯神其技。給機測如神匾額。懸廟園清芬堂之西偏。俗呼為董事廳者。蓋沈所安硯處也。咸豐庚申。西兵駐圍其額始毀。稍後又有陸學海者。五六歲時。父抱懷中。即能握管拆字。長遂以此為業。老而益精。有以求財問者。拈一也字。陸曰。無望也。地無土。難栽樓鳳竹。池無水。難養龍化魚。夫口如此。而十中八九。沈軀頗偉。陸貌清癯。皆意致閒雅。無江湖習氣。陸亦設硯於廟之真君殿。惟書自於背。日不逾百字耳。

兩蒼氏曰。星卜皆近數學。此亦卜之類。但其隨機應變。其言又自有條理。即謂之憑理不憑數也可。

夢應

聞鄒中丞鳴鶴未遇時夢至一署如部院內出一人乃同案生某云在此間掌祿籍鄒即沈查祿壽某入良久出與片紙上書八字云官居四品洪水為災道光辛丑鄒守開封中牟決口黃水灌城危在頃刻因舉前夢告人自恐不免竟獲無恙後任臬撫被劾罷官時粵逆犯江南鄒公藉隸江蘇在江甯督辦團練城陷殉難奉旨照道員例贈卹始知四品乃道員洪水者逆酋洪秀全也事皆前定豈不益信

雪兒

維揚諸生童韞華家貧授徒歲得館穀十餘金炊常斷妻蘇氏以針黹佐升合年五十無子僅生一女性極敏慧體致嫺逸生時天適大雪因名雪兒父母愛之如珍雪兒春夏依母習刺繡秋冬從父讀書七歲背誦毛詩若流常於燈下為人寫佛經百頁字跡秀潤紙白如粉墨光燦然終篇無一點錯父以韻語教之輒解嘗賦春草云萌芽初出帶朝烟恩受東皇轉自憐記得枯根風雪裏不圖新綠有今年父見之曰此女必備悉艱苦而得晚成者道光初江南饑斗米千錢童衣食常不給無何夫婦相繼卒雪兒號慟不食鄰里憐其孝感願措金為之成殮雪兒許鬻身以償時適開封王伯凱孝廉客其地見而憫之贈以二十金既殮願從為奴孝廉鑒其誠遂携以歸雪兒侍孝廉夫婦承順顏色閱數年如一日王夫婦愛如己

此以侍婢待也。王有妹婿姜南甫。設帳鄰邑。值中秋旋里。晨訪孝廉。入書室。檢得孝廉近作古樂府數十篇。反復默誦。忽見窗外樹枝搖動。有人攀折庭桂。於上半吊窗中。瞥見臂瑩如玉。因於窗隙窺之。見一十五六女郎。衣白羅點梅大袖衫。月藍湖縐斗紋百疊裙。丰姿綽約。眉目如畫。因思舅家無閨秀。此女為誰。久之曰。是矣。聞伯凱曩客維揚。得一婢。才色雙絕。必此是也。南甫歸。述所見於夫人。夫人曰。穴隙相窺。此豈瑞士之所為哉。南甫唯唯謝過。夫入微笑曰。雖然。此女可人。我見猶憐。無怪君之不釋也。若得渠侍左右。亦大佳事。君欲之乎。南甫欣然離座曰。不敢請耳。固所願也。奈無投符之術何。夫人曰。兄嘗謂此兒慧由天悟。受書過目能誦。作詩雖淺近。而能自在流出。及門諸子。竟無其匹。我已收為女弟子。他日當於一聯佳句中。覓配不羨王謝門牆徐公雙璧也。兄言既如是。今當以詩為介。倘憐柳下之吟。王府當不惜一侍婢耳。乃代南甫作詩貽兄云。窗前草滿綠無垠。案有圖書點綴新。修到蛾眉稱弟子。不妨風味是清貧。名花雖艷不輕紅。宛轉吹噓仗化工。釀出人間好顏色。纔知珍惜有春風。嫩枝猶在曉烟中。莫任飄零作斷蓬。恰喜海棠未聘何。當移向好。簾櫳名場猶待十年學。紅袖添香願未成。詩婢鄭家如可贈也。持樽酒拜門生。王得詩。即以雪兒贈。後生二子。皆英俊。弱冠游庠。或謂一己登賢書云。此余昔聞之孫紫軒少常者。近閱淮山棟華園

主人閨秀詩評亦輯其詩。惟春草一首。集中另載。而為香山童氏女作。殆一而二者也。
雨蒼氏曰。欲於一聯詩中覓配。命題本佳。又難得彼姝工吟。且肯為婿捉刀。是固良緣雅
事也。妬姜者。方謂何物南甬。得坐享豐福如此。而不知此即天所以報雪兒耳。倘正室有
燕支虎在。雖得婿憐。庸有濟乎。

燈市

我邑歲於三月二十三日。為天后誕辰。先期縣官出示。沿街鳴鑼。令居民懸燈結綵。以祝前
後數日。城外街市。盛設燈綵。自大東門外之大街。直接南門。暨小東門外之小洋行街。及
大湖南北。綿亙數里。高搭彩棚。燈懸不斷。店鋪爭奇。賭勝陳設。商彝周鼎。秦鏡漢匱。內外通
明。遙望如銀山火樹。蘭麝如陣。氤氳馥郁。金吾不禁。徹夜游行。百里外舟楫咸集。浦灘上下
泊舟萬計。名班演劇。百技雜陳。笙歌之聲。晝夜不歇。十九二十日。燈始齊。至二十四五日止
二十八日。又為城隍護海公懿德夫人誕辰。城內街衢。陳設一如城外。二十五六起。至四月
初止。總計城廂內外。閱半月。而燈事始畢。自道光辛丑。海疆多故。駐兵設防。因罷燈市。通
商後。華夷雜處。恐生事端。遂以為禁云。

雨蒼氏曰。亂後文章感慨多拙句也。生際承平。一罹變故。遂覺事無大小。天口皆有今昔。

之既燈市其一端耳。

拐兒挖目

同治甲子春夏間。聞京都都有匪徒。拐取小兒。挖其雙目。或言外國人所使。經駐京各國領事。照會總理衙門。飭捕拿獲匪徒十餘人。內五名。實係拐兒者。供稱取童子雙目。學外國人配。合照像藥。蓋西人圖山川樓閣及人小影。不用畫工。不需筆墨。以玻璃為屋。使一室明朗。架一木匣。用素紙染藥。藏匣中。開鏡照之。頃刻立就更澄以水。則所照之人物顯然而不知所用何藥也。五犯訊明。即行正法。後據西人云。照像之藥。係屑金銀及外洋地產之物合成。並無挖取人眼事。然通商以來。時有異聞。異見。勢不能究其實在耳。

乩仙受欺

聞都中有巨公某。素奉乩仙。談休咎。方粵兵陷江甯時。某嘗叩問吉凶。乩有若問江南好消息。來人丁口自平安句。或謂須俟姓何人來。方可成功。某是時統兵大員。恰無何姓。後以向帥卒於軍。朝命兩江總督何桂清提督和春。統辦軍務。咸以二人之姓。正應乩讖。無不翹望捷音。迨賊破常州。何棄兵而遁。馴致蘇杭繼陷。勢不可支。始以乩語為不足信。夫扶乩之說。皆假神仙之名以惑人。凡問休咎。必作隱語。愚人之深信者。即代為解說。或有一二語適合。

遂相與神之。如孔所言。蓋因廿年前之偽造妖言者。嘗編俚語成書。內即有人丁帶口取江句。或以書示余。余曾火之。不意孔轉信為實。然而借妖言以談休咎。如此嗟乎。孔之欺人者多矣。宜此次之為人所欺也。

尊稱

自尊與自賤相表裏者也。而其故皆緣於不知恥。蓋即一稱謂間。而世變可言矣。昔時鄉宦。凡進士出身者。稱老爺。以一榜得官者。稱老爹。今老爹之稱。不聞已久。幼聞先君子言。前朝孫初陽先生。以萬曆壬子舉於鄉。官右僉都御史。巡撫登萊。居鄉時。值里有慶吊事。必徒步往。人咸呼孫老爹。或以老爺稱之。若有不安者。近日援納之例。大開腰纏數百金。從長安市歸。即乘輿張蓋。競稱老爺。得五六品。稱大老爺。或并不屑為此稱。因而多方處置。得三品銜。而竟稱大人。此皆驕心相勝之故。更有卑而近諛者。某宦以二品告歸。曾見一同姓具東。發輒書家大人。見者無不掩口。夫非分之稱。僕隸之媚。主或然。若士類從之。體統安在。余故於此覘世變也。

兩蒼氏曰。尊人之稱者諂。愛人之尊者驕。究之能諂者無不驕。易驕者亦無不諂。地則異而情自同。習俗相沿。遂成一媿阿世界。勢利心薰。廉恥道喪矣。

醒睡先生

客言漢濱有異人結廬榆山之麓。食藜藿。衣布帛。雖盛夏不去冠服。又好講因果事。聽者咸集。農工午倦者輒往。遂呼為醒睡先生。先生見村人有爭競者。必出而為之解。久之鄉里不
平事。皆鳴之先生。而不履公庭。歲逢亢旱時。見天有片雲。先生必殷然下拜曰。願天之拯萬
民也。或遇淫雨。則禱以晴。故肅立庭中。衣履雖盡濕。勿顧。曰。天罪我。幸勿傷此田禾也。一鄉
之人。以是感稱其德。而名遂遠矣。有大吏慕之。故造其廬。訊一州治狀。則曰。州守多有惡之
者。上惡其疎。下惡其嚴。同列惡其異也。大吏頷之。遂登薦牘。又舉一令為問。則言某聞其卧
齋有額曰。萬物靜觀。亦可明其志矣。蓋取康節詩作歇後語也。大吏識之。遂掛彈章。嗚呼。嘗
聞世有三鋒。不可犯。謂文士筆鋒。辯士舌鋒。勇士劍鋒也。若醒睡先生者。固所稱隱君子也。
而談言微中。有非辯士所能及。人顧可以皮相乎哉。謂有盛德。蚩蚩者誰曰不然。

兩蒼氏曰。讀結處數語。覺作者筆鋒亦殊咄咄可畏。

席某返魂

洞庭席某。善心計。賈淮徐聞。厯十餘年。業頗裕。共事者同里某也。斷金之誼。久而彌堅。席有
女。許與某之仲子為室。未婚而席以暴疾卒。旅邸某為經理喪殮。扶櫬歸。陳厯年帳籍。記載

極詳細人咸推其誠。席舉家亦感之。一日席女神色忽異。謂其母曰。某時良以偽冊示汝。匿銀若干。汝固不知也。席母察其言。儼若故夫。乃泣而前曰。夫其魂返乎。曰然。曰君究以何疾亡。曰偶患暑為庸醫所殺耳。我歸已久。欲與汝一言。而無可憑者。因恨某以人死無據。欺汝孤寡。必欲與之理論。故假女體。亦不得已也。即令具紙筆。旋據案作書。邀某果其字蹟。某得書。駭甚。至其家。女正色曰。余與君情同膠漆。我死意必以孤寡累君。何骨肉未寒。而情同陌路耶。遂按冊逐一指示。自某項至某項。計多出若干。少納若干。因問。是何以故。時某愧甚。不能措一詞。女曰。我念舊好。不訴冥曹。亦不以為怨。倘此後再有私心。我能禍君。無貽後悔。今已證明。請君自便。某去。女曰。速取堂懸之符。覆我身上。如其言。頃又曰。此符無驗。奈何。可往某家急借天師符來。遲則恐傷女命。當即借覆之。女遂寂然。繼如夢覺。此昔席心蓮為余言者。初甚詳。今皆忘其名耳。

兩蒼氏曰。既不訴投陰曹。又不責償陽世。而必證明其事者。可見錢財事小心。術見真。陰謀亦鬼所忌耳。更異借軀面誌。雖死猶生。使阮瞻見之。無鬼論可以不作。

石瑛

蜀郡石生。名瑛。弱冠游庠。羊神秀逸。以父母蚤世。自幼隨大母。依伯父履吉。吉嘗販筍。富有

金而艱於嗣。以故夫婦愛瑤勝已出。尋常不令出庭戶。時屆清明。隨一僕至墳園拜掃。焚帛既畢。散步村郊。去墓二三里。得一溪。溪西有小庵。桃花出短牆。色豔殊常。遂度平橋。繞溪百餘步。見庵門半啓。上懸硃額曰朝雲。入則惟一老僧跌坐。喃喃誦佛號。見客不款接。庵雖小。而結構頗幽潔。庵後小圃。遍植絳桃花。發正繁。局圍槿籬。籬外清潭鏡澄。柳陰蔽日。生喜幽僻。近溪小立。瞥見隔溪茅舍中。板扉忽啟。一絕代女郎。款步而出。衣裝澹雅。隱入花叢。頃見手執梨花一枝。盈盈微笑。冉冉入門。人面花光相掩。映生不覺神搖意奪。癡立久之。未幾日暝。煙凝雙扉。恨鎖。方怏怏間。僕適尋踪至。遂相與返。生歸意戀殊切。思就蘭若下榻。冀得再覩芳顏。乃請於大母。遂假僧舍讀書。居旬餘。怡無所遇。因問僧。隔溪雙扉。常扁者誰氏。僧曰。甘姓。問家有何人。曰。夫婦力耕自給。聞近有寄居者。不知為誰。又問。過溪有徑否。曰。沿溪而西。有小橋可通。一日。生晨起。復至後院。遙望隔溪有女。背坐簷下浣衣。視之。正前所見麗人也。喜極。竟忘顧忌。繞溪疾走。直達其庭。女聞履聲。瞠目回顧。無羞縮狀。生睨之。面麻髻禿。蠢然一物也。即欲返步。女曰。汝來此何事。生踟躕無詞。曰。宅上非甘姓耶。女曰。我家無姓。生曰。誤矣。急趨而出。不禁自笑。即題詩僧舍云。草色遙憐綠正肥。桃花門巷是耶非。等閒已識東風面。萬斛春愁付釣磯。遂辭僧而返。明春履吉。五月初度。戚黨咸集。生有姨母適秦氏。為

里中富室亦來拜祝。僕從如雲。至晚設席內堂。燈燭輝映。女客次第坐。生入內窺探。見秦背
後立一侍婢。絕美。細視之。又似昔日折花女。始悟固有其人。前所晤者。殆非耳。更深客散。生
潛身入謁。秦呼之入。旁坐叙話。生見女俛首側立。眸矚不轉。秦覺之。笑曰。甥好此女乎。固有
眼婢。本楚產。以父死。鬻身來我家。將三載矣。今年十四五耳。其性格體態。在侍婢中固不易
得。然有一短。手揭其裙幅。示生曰。惜乎。底下蓮瓣如蕉葉耳。且有暗疾。衣葛時。腋腺勝蘭麝。
也。言罷掩口笑。生聞乃又悵然失望。未幾。川楚教匪作亂。官軍四集。徐逆就俘。先當履吉。販
楚時。曾與徐族侄同夥。歸後亦通音問。至是以索餘黨。波及庭鞠。無可辯。獄成。吉坐遠配去。
後生奉大母命往探。一日薄暮。行山谷中。無宿所。心惴惴。遙望林外。隱起炊煙。疾趨之。得一
小村落。舍宇無多。咸依山麓。適見一媪汲水溪邊。生即進揖以情告。願乞一席地。得免露宿。
當有薄酬。媪曰。我家無男子。未便留客。生曰。亂山合沓。絕無行人。倘非老母垂憐。懼為虎狼
所食。媪停睇熟視曰。郎君得非石家小秀才乎。生訝曰。是固然矣。不知老母何由相識。媪曰。
老婦本楚人。昔以探親入川。流寓蜀郡鄉間。當郎君送學時。偶同二三村媪入城觀看。故識
之耳。然素聞郎君席豐履厚。日惟閉戶讀書。未審何由至此。生曰。伯父為官事所涉。羈留遠
地。故特親往探之。今早匆匆就道。不暇計程。以致迷竄。媪指臨水短扉曰。此即寒舍。憐君文

弱難忍。霜威室有短榻。可權假一宵耳。生喜隨入之。則小廐花砌。斗室茅簷。頗覺殊雅。將升堂。見一女子從複室出。雖荆布之飾。而光豔射人。見生即翻身入。生以媪在。不敢正視。略一斜睇。覺其體態容華。又宛似隔溪人也。坐未定。聞內嬌聲喚母。媪入。生竊聽之。語細不甚了。惟聞媪曰。秀才非暴客。留何害。少頃進晚餐。葵羹蔬味。食頗不惡。既畢。媪攜燈導生入左廂。匡牀布被。几椅悉備。生展謝不已。問老母上姓。尊府尚有何人。媪曰。我家姓巫。先夫謝世已五載。老婦無子。室惟息女。夔殮。出十指。慚以告客耳。語次。聞低聲喚茶。熟媪起。旋捧一小盤出。內置紫泥壺。及一小杯。生飲之。味甚甘芳。極口稱美。媪曰。此茶名壽春。暢月前芽。摘之雨前。誠為山中貴品。出隣家所惠。聊以供客。生又起謝。媪曰。山村無更鼓。頃見月已西斜。卽君明日長行。宜蚤寢。遂代掩扉而去。生於無意中。得遇佳麗。又異其絕似意中人。反復凝思。不能成寐。天方曙。卽啟扉。頃之。媪亦出。供沐進膳。意甚殷。生酬以金。堅却不受。曰。卽君去途尚遠。留以自便。後或有相見日也。生感謝辭去。越歲始抵戍所。時履吉。為披甲奴。蓬首垢面。見生泣曰。余不幸遭此奇禍。已拚難死。異鄉念石氏。惟汝一點血。了身行巖谷。倘為虎狼食。宗祀絕矣。此地非汝久留。宜速歸。苦志詩書。若得成名。我死無恨。乃為乞諸土人。得附木商而返。然自大訟後。門庭蕭落。生歸時。祖母已物故。室惟伯母。日夜哭泣。雙目失明。生設蒙學。

歲得數金。僅供饑粥。里有邵孝廉者。生同學友也。嘗謂生曰。君無兄弟。今年逾二十。猶未娶。非所以重宗祀。余為君籌之久矣。而苦無其偶。近聞隣有母女避兵來此。女美而賢。君其可意乎。生曰。度日尚愁不足。敢言娶室耶。邵曰。已為君訪明女操針黹。精功絕倫。日可得百錢。足自給。無待食於君也。請勿疑。生猶未應。邵曰。實告君。已代為納聘矣。月朔辰良。可灑掃室中。我當送新婦至。聊備喜筵為賀。更不煩閣下。邵歸也。生遂告知伯母。如期。邵擔酒登堂曰。新婦至矣。生曰。奈無衣冠何。邵曰。故人尚有締袍。未知稱體否。即於袱中出衣一襲。催生速服。頃聞鼓樂聲采輿已至。邵為主理內外事。禮畢。設席堂中。大懼劇飲。入暮辭去。生入見婦。則甚驚異。女曰。君識妾否。妾家即山中假宿處也。生曰。然則朝雲庵後隔溪茅舍中。折梨花入板扉者。非卿耶。女曰。曾有之。君何得見生。因述前事。并言所遇之屢。非至今未釋。女笑曰。是矣。君自見妾後。凡所遇者。妾之姊與妹也。妾同懷姊妹三人。昔年從父入蜀。僑寓甘家。不幸父死。異鄉貧無以殮。遂鬻妹於秦氏。姊雖貌陋。體態頗類妾。因失愛於母。遂配甘家之養子。獨妾自幼讀書。解翰墨。最得母憐。又圖攜妾回里。不意故鄉遭亂。道路梗阻。因之暫避山中。嗣聞逆黨四竄。將次入山。乃又暫回郡城。前邵孝廉來議婚。母詢家世。悉為君故。遂欣諾耳。生聞始末。深嘆遇之奇。而緣之有前定也。生自得女為婦。雖處貧而益不改其樂。女勤事。

女紅舌耕指織漸得溫飽因遂迎養其母厥後履吉以遇赦得歸仍事負販卒成小康云
雨蒼氏曰是耶非耶神光不定一悞再錯絕妙疑團究之赤繩暗繫雖處天涯海角終有
歡聚時但月老如邵孝廉其撮合處允宜買絲繡之鑄金事之家尸而戶祝之叙次亦乍
陰乍陽離奇盡致

奚行鎮

邑東昔有奚行鎮市肆繁盛奚氏聚族而居稱素封焉前明正德初有奚三錫者擅作威福
喜怒自恣鄉里側目無敢忤嘗佔曹姓隣田結訟後奚暮夜入金賂官逮曹轉急曹懼而遁
又株及親黨鎮人大不平陰為聯絡縱火焚奚居奚復鳴於上官當事率兵捕曹黨村人鳴
鼓聚衆以拒至傷武弁事聞於朝枉死者百人而其鎮亦因之遂滅今高行東有蔡家宅即
其址也

好奇售偽

今之收藏家癖好奇書古物而胸無卓識目炫何樓每出示人言且鑿鑿自矜博雅牟利之
輩遂不憚多方增飾即以其所矜者給之往往入其彀中而不覺焉亦可嗤矣南昌賈人錢
子明饒於資好奇藏古器嘗以巨鑿置案頭曰世有奇珍吾豈惜此或以彝鼎書畫來者則曰

此縱佳猶恆有物何取乎。一日客携一古錦匣至。內有物。其形似繭而大如瓢。長尺許。色白。微見青斑。搖之內有聲。云係其宦家藏。傳世既久。子孫不知其名。并不識其用。惟承上世之囑。以故寶藏至今。聞君精於鑒古。特假一觀。冀有所示。錢因笑置之。越日有同好某來訪。錢言及之。某曰。嘗觀異物志。載員嶠山有冰蠶。長七寸。色黑。有鱗角。以霜雪覆之。然後作繭。繭長一尺。織為文錦。入水不濡。投火不燎。唐堯時。海人獻之。堯以為黼黻。此其是乎。若然。真無價物也。錢檢書閱之。良是。乃邀客欲破繭以驗。客不可。錢曰。驗之。若合。願以千金為贈。否則亦以數練之值償之可乎。客遂商於物主。議既定。乃破之。內果蠶脂。色純黑。鱗角可辨。入水不濡。客曰。今惟投諸火矣。兩家其勿悔。物主請置千金於前。而後驗。時某亦在座。私謂錢曰。今已試數端。諒非偽物。盍減厥值。而不竟其驗乎。錢然其說。遂以半價得之。既得。視為至寶。終亦不敢入火。後洩其謀。蓋同好者因其言誇。故給之。入水不濡者。塗以白蠟也。又隣邑富室詹某。胥人子也。或譏其不學。乃出資市書。不數年而東觀西園之富。不是過矣。惟是牙籤錦帙。藉以飾觀。曾未寓目。同邑某羨書價之獲殊厚也。乃於郡中覓得抄本書百卷。以五十金得之。冀售善價。而詹竟不閱。却其書。某窘。乃商於詹之戚全某。全固稱通文墨。為詹所信任者。問某需價幾何。曰。得三百金足矣。全曰。然則當售八百金耳。以四百金與我。尚有百金。

分給其司籍者。書當假我一觀。緩七日來取。某唯唯。及期。全令易一人將書去。并授其言。且曰。如我教。價可得矣。其書詹本未閱。置而不疑。越日。全至詹處。翻閱諸本。檢得是書。佯詫曰。此籍何來。詹曰。亦欲售者。全曰。索價幾何。曰。未之問也。全曰。速與議價。遲恐為識者所得。詹問是書何所奇。全曰。書成某代。素無刊板。世惟工部一藏。內府一在民間。前朝某相國。懸萬金求之。不意今入賈人之手。因於架上取四庫書目。檢示詹。果如所語。詹喜曰。余費金鉅萬。藏書雖充棟。恰愧無秘本。今始得矣。未幾。某往取書。詹問值。某曰。事不諧矣。此書係郡官家藏。為其子弟所竊。昨已有人踪跡至。急欲收歸。不能售也。詹曰。既不欲售。何來我家。余有例來書不售者。照書價罰其半。是書價幾何也。某乞免。詹斷不許。某曰。若此。勢必成訟。事將不可解矣。時全亦在旁。從容言曰。竊書者。諒不敢歸。今姑厚賂來人。但言無踪跡可耳。詹令某即往商價。固勿論。某再往返。始言非千金不可。全勸給八百金而成。詹既得書。全曰。此官家物。若洩於人。必滋訟累。詹遂秘之。其謀固終不洩。聞四庫書目所載。全蓋陰抽其架上本指一書。嵌鈔本名。偽撰提要。仿原樣鐫頁。以易之耳。噫。是與冰蠶繭。何以異哉。

兩蒼氏曰。以偽市偽。絕妙應求。其間一寶異物。一好古書。同此謬稱賞鑒。初似詹勝於錢。然冰蠶作繭。恰從何書本得來。詹惟以書飾觀。正恐求雅反俗。二者交譏。想見胸無點墨。

通為賈人骨人之肖子耳。又蓄書備觀鑒與收藏自是兩事。且其人必先博雅。而後鑒核始精。并須有大力能購。為問海內。當此者有幾。奈何噉名之輩。搜采未多。輒講板刻。浮慕汲古之名。總無開卷之益。原其初心。本與古玩同。其誇耀。是即百城坐擁。適步詹氏後塵。然自制義盛行。今日之所謂髦士者。除講章外。幾於非此不觀。能攻帖詩律賦者。已稱婣雅。於是而線裝書本。幾成棄物。詹能不惜多金。購人所棄。雖慕虛名。而好如不好。猶愈於不知好。而好非當好者歟。

順天戊午科場案

咸豐戊午順天鄉試。以大學士柏蔭為主考。兵部尚書朱鳳標。署戶部右侍郎。左副都御史程庭桂。為副考官。揭曉後。物議沸騰。御史孟傳金。彈奏中式舉人平齡。硃墨不符。請特行覆試。奉旨著載垣。端華。全慶。陳孚恩。悉心查勘。不准稍涉迴護。旋奉硃諭。以是科試卷。應訊辦查議者。竟有五十本之多。柏蔭著先行革職。朱鳳標。程庭桂。均著暫行解任。聽候王大臣等認真研鞠。從嚴懲辦等云。旋據載垣等奏。訊得科場一案。兵部主事李鶴齡。代刑部主事羅鴻繹。訂正關節。以條子送與同考官編修浦安。入闈後。浦安見卷內字眼。隨即批薦。并託柏蔭家人靳祥。稱伊房中血卷。監卷為四卷。在中。五首謂之中。四。只此一本。懇求中式。柏蔭聽從。將他卷撤換。

即以恭字十二號羅鴻繹卷補中。事後浦安得銀三百兩。李鶴齡亦得二百兩。又據平齡供稱稱係廂白旗包衣。曾在票班唱戲。同考官編修鄒應麟以其卷有錯訛。疑係謄錄所悞。適隨帶硃墨。率為更正等語。至程庭桂接收關節一案。人證未齊。請暫緩擬結。柏俊等既經訊明。且與陳庭桂案無涉。應即先行擬結。當抄各犯供招。送刑部按律定擬。旋准部覆。照例。主試官及應試舉子。有交通囑託。賄買關節等弊。問實斬決。浦安李鶴齡羅鴻繹。應照交通囑託例。擬斬立決。柏俊家人靳祥。及已革舉人平齡。俱經在獄病故。應毋庸議。浦安等所受銀兩。均應照追入官。惟柏俊一犯。僅聽囑託。不知關節。作何分別治罪。並無條例。應請交王大臣酌核辦理。迨載垣等奏。柏俊係一品大員。聽受囑託。輒將羅鴻繹取中。實屬咎由自取。仍請比照前例。擬斬立決。其副考官解任戶部尚書朱鳳標。雖訊無情弊。而當柏俊補中試卷時。何以未詢撤換緣由。出場後。又不即行參奏。實屬違例。同考官翰林院編修鄒應麟。率改平齡試卷。亦屬違例。妄為請俱交部嚴議。至應行查辦之試卷十二本。當將房考各官。並該舉人韓宗文。亢懋庸。耿光裕。謝祖源。余汝偕。朱大繩。郭受昌。景灑。德生。九名。及現已出京。未經到案之舉人。潘觀保。李汝廉。吳心鑑。三名。原勘。或詩內失黏。或擡頭錯誤。暨洗改挖補。草率各情。應如何置議之處。謹抄錄原供。移咨禮部。查照科場條例。定擬具奏。外如監臨監試。及

專司稽查。內外廉執事各官。並搜檢王大臣等。應行核議之處。俟將程庭桂案訊明後。再行咨部。分別辦理。咸豐九年二月十四日。皇上御勤政殿。召見惠親王綿愉。怡親王載垣。鄭親王端華。軍機大臣內務府大臣等。面諭大略。以科場為抡才大典。交通舞弊。定例甚嚴。柏後身任大學生。在內廷行走有年。且係科甲進身。豈不知科場定例。竟以家人求請。輒敢撤換試卷。既有成憲可循。朕即不為已甚。遂照王大臣所擬。柏後即行處斬。派肅順趙光。赴市曹監視行刑。天語尚有情。雖可原。法難寬宥。言念及此。不禁垂淚之諭。餘如浦安。羅鴻禔。李鶴齡。均照例斬決。以副考官朱鳳標。尚無知情情弊。從寬革職。鄒應麟。亦即革職。永不叙用。并諭嗣後科場大典。秉文衡者。皆當潔已虛懷。杜絕干請。應試士子。亦各立品自愛。朕此次執法嚴懲。為士林維持風氣。爾在廷諸臣。當能默喻朕衷云云。迨王大臣等會審程庭桂收受關節事。據伊子。已革工部候補郎中程炳采。供出兵部尚書陳孚恩之子。候補員外郎陳景彥。曾交條子。又工部右侍郎潘曾瑩之子。庶吉士潘祖同。曾為其同鄉謝森墀。代送條子入關等情。得旨。陳景彥。潘祖同。著即革職。歸案辦理。陳孚恩。潘曾瑩。教子無方。均交部議處。此案關涉陳景彥之處。陳孚恩著照例迴避。餘仍秉公會訊。復據王大臣等。訊出前任刑部侍郎李清鳳。有送給程庭桂條子事。清鳳時已回籍。旋有步軍統領衙門奉旨行文蘇省督撫。

取具確供。由驛馳奏。及據李清鳳供詞。稱於八月初二日。已奏請告病。其子李旦華。與幕友王錦麟下場。並未中式。其如何賄通關節處。實不知情。並究伊子李旦華。果有圖買關節。送給程庭桂銀兩未收等情。當將伊子交出候訊。自請治罪。得旨李旦華假托父命。私送條子。并代同藉恩貢生王錦麟致送條子事。著即革職。由該督撫派員解京歸案。王錦麟尚未回籍。著步軍統領衙門查傳到案。一併訊辦。李清鳳著降一級調用。准其抵銷。王大臣等復督飭章京司員。詳訊程炳采。據供伊父入闈後。李旦華即遣家人送書一封。內有關節條二紙。一係李旦華。一係王錦麟。經程炳采收下。外有銀百兩。仍交來人帶回。後又有已革候選通判潘敦儼。所送關節條子。已革翰林院庶吉士潘祖同。代工部候選郎中謝森墀。送去關節條子。均經程炳采收下。並伊家教讀之附貢生熊元培。亦寫給條子。後經家人黃太。遞進彭家書信一封。內附條子。有中皿字樣。程炳采因彭係南官。請補今寫中皿。知為假冒。即將條子撕毀。並未查係何人。但取來封。裝入熊元培條子。令家人胡升帶進。共四封。係李旦華。王錦麟。潘敦儼。熊元培。其潘祖同。代謝森墀。所送條子。即行撕毀。並未帶進。胡升入場。將帶去之條。並交伊主程庭桂收閱。接經王大臣等。家訊程庭桂。彭家有無關節。據稱實未看見。至兒子在家。接收條子。無從禁止。家人胡升。將封套送入。又無可拒絕。是時惟恐誤為取中。特

將條子收存。比提中卷核對。見無條內字樣。當即燒毀。但平日不能管教兒子。約束家人。及見條子。又不即時舉發。實屬糊塗。辜負天恩。求皇上從重治罪等語。而程炳采所供彭家來信。係彭祖彝名。其將熊元培關節。裝入彭封。並囑胡升稱係彭送者。意圖混瞞伊父。及傳彭祖彝到案。據稱上年六月間。曾於程炳采處信取印結一紙。此後並無隻字。至黃太所供彭家送信之人。不知姓名。年約三十餘歲。初見門外拴著青騾一頭。及接信進內。復出看時。則人騾俱已無蹤。更質之熊元培。稱將關節條子確交程炳采。並無託彭轉送之事。於是王大臣等彙奏。據供各情。尚屬可信。而假冒彭姓之人。投書後即行。勢難追究。應即擬結。當抄各犯供招。咨送刑部。定擬罪名。旋准部覆。稱有已成未成之別。以案內現犯五副榜俱未中式。亦無挑取謄錄之人。並未侵占中額。程庭桂應照未成擬罪。於斬罪上減一等。擬杖一百。流三千里。仍從重發往新疆。効力贖罪。程炳采接收條子。傳遞入闈。但未經中式。應於斬罪上減一等。擬流。加遣。該革員於伊父入場後。輒敢接送多條。情罪較重。然罪已至遣。無可復加。應從重發往新疆。充當苦差。遇赦不赦。李旦華等。或遞關節。或代致送。俱未中式。均減一等。擬杖一百。流三千里。王大臣等。以刑部所擬罪名。似與例意未合。復片刑部。查明例內。有無分別已成未成明文。嗣准刑部覆片。稱查定例。雖有無論已成未成語。原因例文簡括。不逐

條詳載。但引例辨案。自應酌核案情。分別定擬。詳釋例意。考官之子。所以舞弊者。皆因中式起見。中式則照已成例定罪。未經中式。理應減等。旋載垣等。疎陳程庭桂身任考官。於闈中收受關節。並不舉發。實屬瞻徇容隱。臣等於例律雖未周知。然查科場舞弊。例禁甚嚴。原以科舉大典。為國樹人。不容絲毫情弊。是以特峻其法。以彰國憲。而禁場弊。程庭桂身係二品大員。乃於奉命掄才。輒敢收受關節。雖均未取中。而其徇情作弊。已可概見。若猶以未成論。恐於例意未協。臣等仍照交通賄買斷決。擬斬立決。可否稍從未減。出自皇上天恩。至程炳采。乃伊父入場後。竟公然接送關節。毫無顧忌。且該犯身非考官。一經接遞關節。即為已成。中與不中。權不在手。尤難以此區別罪名。程炳采擬斬立決。至李旦華等。臣等前曾面奉諭旨。著均加恩。免議死罪。仰見我皇上法外施仁之至意。但刑部所定李旦華等擬流。按李旦華。王錦麟。謝森墀。俱屬職官。應從重發往新疆。効力贖罪。所擬熊元培杖一百。流三千里。交順天府定地。到配後。折責安置。其潘敦儼。潘祖同。由律得容隱之親屬。詰出實情。與自首無異。擬於流罪上。再減一等。杖一百。徒三年。仍從重發往軍臺。効力贖罪。按該革員等。已蒙恩施格外。減免死罪。未便再行遞減。合與李旦華等。一律定擬。應將熊元培。潘敦儼。潘祖同。均發往新疆。効力贖罪。胡升受僱服役。聽從程炳采囑遞關節。雖無情弊。究屬知情。應於程炳

采斬罪上酌核遞減擬杖一百徒三年黃太李貴按送書信不知內係係子均免置議李旦華之父前任刑部侍郎李清鳳潘祖同之父工部侍郎潘曾瑩均已奉旨交部議處潘敦儼之父降調湖南布政使潘鐸雖將伊子詰出實情呈送到案均屬訓子無方亦應請旨交部議處其監臨監試專司稽查及內外簾執事各員並搜檢王大臣等有無應議之處應請飭下禮部按照科場條例據實查明由該部移咨吏部等衙門分別議處再兵部尚書陳孚恩之子陳景彥曾遞關節條子程炳采未送入場旋據陳孚恩在寓嚴詰屬實即將伊子解送歸案查陳景彥雖未中式既經囑託亦屬交通擬同李旦華等均發往新疆効力贖罪伊父陳孚恩已經奉旨交部議處至臣等奉派審訊擬結遲延相應請旨議處是日皇上御勤政殿召見惠親王綿愉怡親王載垣鄭親王端華兵部尚書陳孚恩軍機大臣彭蘊章穆蔭巨源文祥等諭曰上年順天鄉試科場舞弊經欽派王大臣審明定擬二月間降旨將柏俊等分別懲辦並宣示在廷諸臣俾咸知朕意本日據載垣等奏科場案內審明已革大員已革職員定擬罪名科場為抡才大典考試官及應試舉子有交通囑託賄買關節等弊問實斬決定例綦嚴不得以曾否取中分別已成未成此案已革工部候補郎中程炳采於伊父程庭桂入場後竟公然接收關節令家人胡升轉遞入內即係交通囑託關節情罪重大豈以

已中未中。強為區別。程炳采著照該大臣所擬。即行處斬。已革二品頂戴。左副都御史程庭桂。身任考官。於伊子轉遞關節。並不舉發。是其有心蒙蔽。已可概見。雖所收條子。未經中式。而交通已成。確有實據。即立予斬決。已屬罪有應得。惟念伊子程炳采。已身罹大辟。情殊可憫。若將伊並置重典。父子概予駢首。朕心實有不忍。程庭桂著加恩發往軍臺効力贖罪。此係朕法外施仁。並非從死罪遞減。亦非因其接收關節。未經中式。姑從未減也。至送關節之謝森墀等。應照科場專條治以死罪。惟與業經正法之羅鴻繹等。尚屬有間。工部候補郎中謝森墀。恩貢生報捐國子監學正學錄王錦麟。著革職。熊元培著革去附貢生。與已革候補郎中李旦華。已革候補通判潘敦儼。已革翰林院庶吉士潘祖同。已革候補員外郎陳景彥。加恩免其死罪。著照所擬。均發往新疆効力贖罪。李旦華之父李清鳳。現在原籍病故。著該部查明。如李旦華家有次丁。著即起解。如無次丁。安葬伊父後。再行發遣。降調湖南布政使潘鐸。訓子無方。著交部議處。其應議之監臨監試專司稽查。及內外廉執事各員。所司何事。應議之處。著禮部按照科場條例。據實查明。詳晰開列銜名具奏。載垣等未能究出冒名之人。承審遲延。自請議處。載垣端華全慶陳孚恩。著交宗人府吏部。照例議處。至科場律例。本有專條。刑部所擬程庭桂罪名。俱不在科例內。輒將尚辯各案。以已成未成。比擬實屬不合。

業與王大臣等摺內詳細批示。若照硃批給予處分。該堂官等難當此重咎。著傳旨申飭。科場一案。前後所降諭旨。著即補入禮刑二部則例。永遠遵行。餘依議。欽此。旋宗人府、吏部、議、潘鐸照失察子弟夤緣犯法例。降一級調用。王大臣等審結遲延。均照督撫承審特旨案。件遲延例。均罰俸一年。奉旨依議。禮部奏應議監臨等各員。失察處分。監臨及內外簾監。均降三級留任。內如御史尹耕雲、奎斌。復失察主考家人。向房官查換中卷。照例降三級調用。其貢院門搜檢、磚門搜檢、專司稽查。外場巡察各員。均擬罰俸一年。以上應得處分。雖係公罪。均不准抵銷。奉旨依議。先是順天鄉試卷冊。例由治中及糧馬通判辦理。定於初六日送院。不料遲至初七日。并多錯誤。監臨景簾、巡察磚門御史徵麟等。奏參治中蔣大鏞、糧馬通判蕭鼎禧。承辦試卷遲延。名冊舛錯。得旨交部議處。而順天府府丞提調蔣達。於初十日。與監臨同新。意見不合。負氣出闈。奏參府尹梁同新。不令書吏預造執事各員名冊。致入闈後。草率分派。漫無稽查。甚有有其名而無其人者。又不令通判蕭鼎禧入場。而派即補知縣蕭履中。縣丞蕭瑞成等。盤踞場內之大所。又以典史、吏目等官。把持磚門外總辦一切供應之小所。而大興縣賀廷鑾。宛平縣毛慶麟。於內外供給。任意偷減。致主考房官之煤米紙燭。全不敷用。刊刻題紙。亦不精選。發題後。紛紛以破爛之紙來換。關防印文。或無其字。該府尹

袒護屬員。並不責問。臣舌敝唇焦。窮日夜呼應。不靈。徒深焦急。致積熱積勞。迫成急症。不能辦公。抱疾出闈。自請嚴議。旋奉上諭。有覽奏實堪詫異語。以府丞提調鄉闈。是其專責。意見不合。原可專摺具奏。乃竟自稱患病。負氣出闈。實屬謬妄糊塗。將達即交部嚴議。至所參梁同新等各情。則與監臨景廉副都統載鷺監試志文等所奏。大致相同。欽派瑞常會同載鷺寶璽。逐款查明。據實參奏。又以梁同新任用非人。以致諸務廢弛。有心狗庇。特先交部議處。景廉既充監臨。亦難辭咎。并交部議。及瑞常等查明奏覆後。部議將達照溺職例。擬革職。梁同同照狗庇例。擬降三級調用。工部右侍郎景廉。照防範不嚴例。擬降一級留任。若將大鑪蕭鼎禧等。均議降調。可見事必有兆。是科弊竇。致釀大獄紛紛者。已於此發端云。

雨蒼氏曰。科場舞弊。例禁甚嚴。恐礙寒畯進身也。此案發行於貴。近雖閣部大員。蹈此亦不姑恕。微特□□治朝刑政清明。而乾綱一震。士氣皆伸。實足為鄉會維持風氣。想國家鄭重抡才。重士如此。士猶可以不自重哉。

還山圖

婺源齊玉谿。學裘梅麓太守長公子也。能詩。善書。性樂閒適。不求仕進。視極短。窮睫之力。不及尋丈。出入一小童扶掖之。以為常。道光戊申。曾來滬上。與余結文字交。一日偕之游豫園。

見石梁穹窿跨水上。因擬乘月夜游。謂其潭清鏡澄。境必勝於晝也。是晚適值月明如晝。漏
三下。余將寢矣。忽聞扣門聲。啓視則齊子也。曰。見此月色。寢不成寐。能赴日間之約乎。余曰
可。遂與踏月北行。漫步至園。度平橋九曲。登溪西一山。四望。月皓如銀。上下明淨。山巔有小
亭。於此少憩。繼至石梁。見有數丐偃卧欄邊。余曰。此非先得我心者乎。齊子大笑。遂與余並
坐。誦所作舊游明月山詩。音韻琅琅。若出金石。及倦而歸。東方欲白矣。後雖返棹吳門。而郵
筒不絕。嗣以寇氛迭警。音始杳如。同治丁卯。應敏齋觀察。招之復來申浦。唏噓相對。各叙闊
衷。蓋已頽然老矣。未幾即擬賦歸。乃出還山圖小影。索余題句。因賦七古一章云。新安之山
繚而盲。中有詩人玉谿老。玉谿生負瓌異才。天涯閱徧知音少。憶昔與君參翱翔。詩酒頻年
旗鼓當。河梁分手幾廿載。雲停月落心茫茫。日斜鳥自憐飛倦。片帆小駐申江岸。展畫殷勤
囑我題。請留別後相思券。乍慨中原蕪劫塵。何緣得見故園春。藍輿快舁還家客。猿鶴情親
舊主人。幾輩京華長作客。梯雲願捧從軍檄。孰若圖中自在身。山泉洗盡風塵色。星江之水
清復清。波為鏡兮山為屏。自君之去我復嘆。故人落落如晨星。自念余交齊子。垂二十年中
為兵戈所阻。幾不相識。何幸河山無恙。舊雨重逢。是即手握須臾。殊覺歡逾平素。所難為懷
者。會後重離。正在此番賦別耳。昔與唱和之作。皆不能記。惟於余畫有嗜痂之癖。憶常為寫

四圖各係以詩若詞其畫皆毀於亂慢錄題句以存爪痕題雲起樓云山光靈靈山峰青山
雲朵朵環山生先生有樓當其處名以雲起能移情捲簾朝向樓頭坐遙看雲影連山鎖習
靜還來樓上眠絮團入牖飛綿綿壓樓忽覺紗牕暗山雨欲來雲更亂晴旭時留屋角紅游
絲一縷飛長空陰晴變幻一彈指纔見雲沉又雲起浮沉聚散本無端世事從來類如此巖
下老人歲月寬棄置軒冕樓山密長嘯一聲天地迥白雲留得此身安題碧梧書屋云平生
最畏熱炎敲無術取羨君書屋旁厯厯植高梧清風灑然來涼意透羅幃濃蔭布花磚一碧
纖塵無笑彼熱中人僕僕走道途人生貴適意名利安足圖先生無俗情抱膝居蓬壺題聽
雨舫調寄吳山青云意悠悠雨聲稠綠影涼添枕簟秋風過竹韻流冷颼颼下簾鉤碎滴芭
蕉聲未休深宵清更幽題春柳吟社調寄蝴蝶兒云惠風柔鳥聲幽煙疑細柳綠陰浮新詩
幾留社許集晴和候名流共唱酬掛颿我欲到蘇州遲遲春暮否右皆當時興到所作茲因
還山圖而類及之固無足述惟是歲月不居未免慨生今昔此在齊子當亦以為然者也

雨蒼氏曰詩情畫意尚可言傳惟此一片深情當於言外領味

海濱問字圖記

圖為學博章鐵珊先生作曰問字者蓋承亭之名也我邑文廟向在署縣東左右兩街為南

北通衢市肆稠密。咸豐癸丑會匪之亂。為賊首劉麗川所踞。克復後。遂燬於火。董其事者。以
西城游府署。基四面環水。地勢雄秀。較勝舊趾。遂請於當事而遷焉。廟左即為學署。傍河別
築精舍數楹。建亭曰問字。曲廊旋繞。清流環映。對岸植梅百樹。春時花開。似雪香氣襲人。梅
蕊既落。則楊柳垂隄。桃花泛水。望之。又儼如圖畫矣。時值蘇州章鐵珊孝廉安行。秉鐸我邑。
講學之暇。時集諸名流。觴咏其間。先生嘗謂余曰。冷宦廿年。所愜意者。惟此一段光景。子盍
為我圖之。嗣以庚申辛酉間。金陵洪兵下竄。蘇常失陷。敵氛熾逼。秦西英法諸國。統兵協防。
航海來滬。假學宮以駐其兵。越四載始撤。則殿宇樹木。半為所毀矣。今雖鳩工重葺。正恐難
復舊觀。又值先生方擢任淮安。行且有日。因姑寫其大意。補作海濱問字圖。長卷歸之。并題
小詩三絕。其一。圖成餞別。悵離愁。淮水湯湯不住流。聞道天風暫吹轉。海濱絳帳爭重留。先生
時以大府咨留二。腥羶盡掃講堂空。亭館重收補葺功。可惜梅花三百樹。更無纖影落池中。已遷回學署

三。頻年烽火鬱難消。閒然詩筒與酒瓢。今喜故人都健在。納涼可復一樽招。詩未必佳。第憶
昔日於此亭中。與先生焚香讀畫。煮茗談詩。此境此情。竟難復得。茲之繪圖作記。亦以誌今
昔之感云。

雨蒼氏曰。圖景世當不乏。特非冷宦廿年者。恰不知領略耳。今得是圖以傳。此景此情。或

不與水俱逝也

鷹武將軍

江西上饒縣之靈山。峰巒奇聳。為一方巨鎮。舊有鷹武將軍廟。考諸志乘。神姓李氏。名德勝。河南沈邱人。唐德宗時進士。由吏部員外郎。出守信州。貞元六年。禱雨立應。民感其誠。建廟祀之。宋宣和間。王師討方臘。神以白鷹。白旗。顯靈。乃賜廟額曰鷹武。紹興初。官軍攻永昌。不克。守令乞靈於神。奏封助靈將軍。明嘉靖間。大學士夏言。請賜號靈山鷹武將軍。至我朝。禱雨祈晴。迭昭靈應。乾隆乙亥丙子。猛虎為孽。知縣李文耀。齋戒致禱。虎即自斃。咸豐五年三月。粵匪洪秀全。分股陷信州。羅澤南馳援。賊見北山白旗林立。倉皇出東門。一時火藥自燃。互相踐踏。官軍乘勢兜擊。光復城池。六年八月。賊由下流來犯。知府事者。沈公葆貞也。時防兵外挫。郡城已空。忽大雨如注。旋得饒廷選督兵。順流下擊。雖獲勝。而兵力未足。不敢輕進。以賊營中。猛聞群鷹飛鳴。遂相驚遁。十一年八月。忠王李秀成。乘大霧疾逼郡城。忽見白旗。現空。賊遽披靡。似此化險為安。皆賴神力。經現任江西巡撫沈公葆貞。恭摺奏請。勅加封號。以答神庥。夫神於前代。有功得享廟祀。今又屢昭顯應。力保危城。功德在民。固宜春秋昭報。

云。

對山書屋墨餘錄卷一終